

مکتبتہ

ایڈیٹری و
الجزیبہ

أحمد عاطف





www.Mktbtk.uk

الإنس والجبس



ك

الإنس والجبس

أحمد عاطف

دار تويبا للنشر و التوزيع

٢٤ يناير، ٢٠١٩



شراء 53,06 ج.م.

نموذج مجاني



مشاركة



قائمة المفضلات

يجب توفر إمكانية التكبير/التصغير للقراءة على الشاشات الأصغر حجماً.



مشابهة



الخيال العلمي
والفنتازيا



١

مكتبتك



الكتاب دا هو بداية لمغامرة جديدة في مستشفى جديدة بعد ما

Mktbtk.uk

www.Mktbtk.uk

www.Mktbtk.uk

و
>
CK





عنوان الكتاب : الإنس والجيس
الكاتب : أحمد عاطف
تصحيح لغوى : سوزان عبد الفتى
تصميم الغلاف : مختار زين
إخراج فنى : سكون
رقم الإيداع : ٢٥٨٦٢ / ٢٠١٨
ردمك : 978-977-6549-87-6
الطبعة الأولى : ديسمبر ٢٠١٨

رئيس مجلس الإدارة: شريف الليثي



دار تويبا للنشر والتوزيع



dartoya2015@gmail.com



دار تويبا للنشر و التوزيع Dar.toya



@Dar_Toya



Dar.toya



(+2)01202222098



٣٥ شارع النصر - الهادي - القاهرة - مصر

مكتبتك



جميع حقوق الطبع والنشر محفوظة للدار

Mktbtk.uk

www.Mktbtk.uk

www.Mktbtk.uk

أحمد عاطف

مكتبتك



الإنس والجيس

مكتبتك



Mktbtk.uk

www.Mktbtk.uk

الفهرس

- 13..... الجبيرة 1
- 17..... الجبيرة 2
- 21..... سكن الأطباء
- 25..... عيل قالع يا ولاد الحلال
- 29..... السياحة أدب
- 33..... الفلوس الحلال ما بتضعش
- 37..... مهمة مستحيلة
- 43..... إسعاف 55
- 47..... الرجل السويتش
- 51..... أنا يا بنتى!!
- 53..... حلم عجيب
- 57..... كفاياك ممبر
- 61..... معلش
- 65..... عيد ميلاد هولوكو
- 69..... زراعة النخاع في غير موسمه
- 73..... تنمية بشرية
- 75..... ما هي نقصاكي يا هبة
- 79..... الله يخربيتك يا سهير
- 83..... واوا

- 87..... صراع ع النيل
- 93..... كاس العالم
- 97..... **The Minions**
- 101..... المخترعين
- 107..... عزمى وأشجان
- 109..... أجمل إحساس في الكون
- 111..... اللي جاي حمادة " حرفياً"
- 115..... **The shape of water**
- 119..... أوبن بوفيه
- 125..... من الذي ثقب الاوزون ؟
- 129..... فى دقيقتين ياخذ الكبد وياخذ العين
- 133..... ياللي ع التربة حود ع الما
- 137..... إنجاز علمى رهيب
- 139..... **Wonder**
- 143..... كل الطرق تؤدي إلى جلطة
- 147..... الدكتور أحمد هارون
- 149..... الحرب العالمية الرابعة
- 153..... نوتة حياتى يا عين
- 157..... المسطول
- 161..... يا عزيزى لا تطمنن أبداً للبراييز
- 163..... استلم وأخلي
- 167..... مش مستشفى زفتى دي بردو يا خويا
- 171..... نهاية وبداية

www.Mktbtk.uk

مكتبتك



هذا العمل اهداء الى روح الدكتور محمد القرنفلى مدير
المستشفى

«هو لسة مماتش .. بس ان شاء الله»

مكتبتك



Mktbtk.uk

www.Mktbtk.uk

www.Mktbtk.uk

و
ب
ك



www.Mktbtk.uk

بسم الله الرحمن الرحيم

مكتبتك

بداية جديدة على النيل

الكتاب دا هو بداية لمغامرة جديدة في مستشفى جديدة بعد ما خلصت مغامراتي في الوحدة الصحية اللي كنت فيها في إحدى قرى محافظة الغربية، مغامراتي اللي دونتها في كتابي الأول «بالطو وفانلة وتاب».. لو قرينه أكيد هتبقى عارف المرمطة اللي أنا اتمرمطتها كويس، ولو مقرتهوش فخلي حد قراه يحكيلك عن المرمطة اللي أنا اتمرمطتها أو ما يحكيش هو مش فارق عمتاً، لأن دي رحلة جديدة كلياً ملهاش أي علاقة بالكتاب الأول.

المهم بعد المرمطة في شغل الوحدة الصحية بكفر الحاج هيشم لمدة سنتين (مدة فترة التكليف) جه الوقت أخيراً إني ابدأ مرحلة جديدة في حياتي الطبية وهي مرحلة «النيابة» اللي هي مرحلة التخصص، يعني هنتقل من مرحلة طبيب التكليف بتاع الوحدة الصحية اللي بيعالج كل حاجة إلى مرحلة الطبيب المتخصص في

حاجة واحدة بس، وأنا اخترت تخصص «العظام» عشان يكون هو الحاجة الواحدة دي.

كتبت رغباتي في موقع التقديم بتاع الوزارة، وللأسف كتبته عمياني من غير ما أعرف المستشفيات ولا أسأل عليها، فجتلي مستشفى في إسكندرية بعيدة وطريقها وحش ومفيهاش شغل خالص، يعني مش هتعلم أي حاجة، عشان كذا قبل ما استلم فيها قولت لا أنا هعمل حاجة اسمها «تعديل جهة نيابة» ودا أوبشن متاح ليك مرة واحدة فقط خلال أول سنة في النيابة، لذلك كنت حريص جداً قبل ما أكتب اسم المستشفى الجديدة في الأوبشن دا، لأنني بمجرد ما هكتبه مش هينفع أغير تاني المستشفى قبل مرور سنة، يعني هلبسها لمدة سنة كاملة متكاملة لو طلعت وحشة، عشان كذا قولت المرة دي بقى لازم أروح أشوف المستشفى اللي هكتبها على الواقع قبل ما أعمل أي حاجة عشان متدبش.

المهم حددت لنفسى مستشفيتين في القاهرة اختار ما بينهم واحدة، وروحتهم الأتنين عشان اختار واحدة منهم اكتبها في طلب تعديل جهة النيابة، والمستشفيتين كانو حلوان العام ومستشفى الملك الصالح، وروح حلوان العام لقيتها فيها دكاترة ومرضى وزحمة يعني عادي زيهازي أي مستشفى حكومية شغالة، وبعدين وروح لمستشفى الملك الصالح، ودي لما سألت عليها قالولي إنها دقيقتين من المنيل، وأنا اللي أعرفه إن المنيل دي منطقة حلوة جداً وراقية، عشان كذا اتفائلت بالمستشفى، بس عمرى ما كنت أتوقع

إني لما أروحها هلاقيها بتطل على النيل مباشرة والباب بتاعها قدامه الكورنيش!

الله .. دي بينها هتلعب يا واديا أحمد وهتنسى أيام كفر الحاج هيثم والترعة الي مليانة طحالب وقراميط قدام الوحدة الصحية، والي هيدخل يكشف عندي هيبقى من نوعية الناس الي بتدخل لابسة نضارة شمس وساحبة في أيديها كلب أبيض صغير بفرو لابس نضارة شمس هو كمان، ولا اقولكو، أبطل نق ونبر، عشان أنا كل ما أقول دي بينها هتلعب ما بتلعبش ... أنا هصبر ... لما أدخل المستشفى أتأكد.

دخلت من باب المستشفى وبصيت ورايا في الخباثة كدا (عشان أتأكد إن النيل لسة موجود قدامها ولا لأ.. عشان عارف أنا الحركات دي)... ودخلت جوه المستشفى لقيتها لسة متجددة من سنة وحلوة جداً شكلها يفتح النفس، فقولت لسة متجددة وقدامها النيل، طب والله العظيم لكاتبها طبعاً في تعديل جهة النيابة، أنا هعوز إيه أكثر من كدا.

وخرجت بقى بسرعة عشان أروح الوزارة أخلص ورق التعديل دا واستلم في مستشفى الملك الصالح، وأنا طول الطريق للوزارة عمال أتخيل إن الأستاذة ياسمين صبري ساحبة الكلب بينك بتاعها وبتمشى على الكورنيش وفجأة الكلب يجري شوية فيشدها فتكفي على بوزها تقع أيدها تتكسر ف تيجي تكشف عندي.

خلصت بقى الورق والروتين في كام يوم كدا وخذته وروحت
المستشفى دى بقى عشان استلم، ودخلت من باب المستشفى بكل
فخر وانشكاح، اللي هو أخيرا اشتغلت في مكان ع النيل يا بلد،
ودخلت جوه المستشفى خلصت ورق استلامي وروحت لرئيس قسم
العظام حطلي الجدول بتاعي وعرفت مواعيد نبطشياتي وكله تمام.

وأنا مروح بقى ومعدني على الاستقبال في طريقي للخروج
من المستشفى، لقيت واحد متشلفط بالسيوف على جسمه ورقبته
ووشه ومعاه اتنين متشلفطين زيه بالظبط وعمال يزعق ويقول:
(فين الدكاترة ولاد الـ*** اللي هنا!!!!!!!!!!!!!!!!!!!!) لسة يحاول
استوعب إيه اللي حصل لقيت ست لابسة عباية سودا مجسمة بترتر
كثير أوي عندها حوالي ٤٠ سنة ومطلعة أوصة صفرا مصبوغة
بالأوكسوجين من الطرحة وفاتحة المراية اللي هي بتبقى في البوك
دي، وعمالة تبص فيها وماشية في المستشفى بالشبشب أبو كعب
مش عارف جاية منين ولا رايحة فين!

مفيش دقيقة وأنا مذهول من اللي أنا شايفه ولقيت واحد من
أفراد الأمن ماشي متعصب عمال يلف على المرضى في الاستقبال
يقولهم: (مين ابن الـ*** اللي راكن التوكتوك بتاعه وقافل
مدخل المستشفى)!

أنا بكل ذهول علطول جريت روحت اسأل الأمن مدخل
مستشفى إيه!! منا جاي منه ومفيش تكاتك!! ومين الناس دول؟
فعرفت بقى إن المستشفى ليها بابين ... باب رئيسي على النيل

بيدخل منه المدير والدكاترة والناس المهمة ونادراً لما مرضى بتدخل منه ... وباب تاني ورا المستشفى فاتح على عزبة في منطقة عشوائية، وقدام الباب دا بالنظبط فاتح ٣ غرز عليهم ناس بيشر بوا مخدرات عيني عينك وبيتاجرو في كل حاجة لأن مفيش شرطة بتهوب هناك، وعرفت كمان إن الباب دا بقى هو اللي بيدخل منه ٩٠٪ من المرضى، محدش بيدخل من ع النيل خالص، فأدركت حينها أنها متيسرة .. لأ بجد متيسرة !

والباب دا أوزي ما أنا بسميه «الفجوة الزمنية» كان المدخل لـ أبطال أغلب مغامراتي في المستشفى دي، واللى هحكىها في فصول منفصلة متصلة في اللي جاي من الكتاب .. ومفيش ياسمين صبرى يا أبو عين تفلق الظلط ... منكو لله.

مكتبتك



Mktbtk.uk

مكتبتك

مكتبتك لعمل الكتب اندرويد ورفعها على جوجل بلاي

كتب معرض الكتاب على موبايلك اثناء المعرض

يمكنك طلب اي كتاب على جوجل كتب فقط بربع الثمن

ان اردت رفع كتاب لك يمكن ان ترسل لنا على صفحتنا
على فيس بوك (مكتبتك) او (Mktbtk.uk)

يوجد ايضاً افلام ومسلسلات بدون اعلانات على موقعنا

www.Mktbtk.uk

www.Mktbtk.uk



www.Mktbtk.uk

الجيرة 1

(بطولة أحمد عاطف السقا)

الموضوع متأخرش كثير عشان أقابل أول العجائب في المستشفى الجديدة.. من تاني نبطشية على طول والله كانت الصدمة والمفاجأة.. من تاني نبطشية حصل موقف من أغرب المواقف اللي قابلتني في أي نبطشية.

قاعد في أوضة استقبال العظام أنا والنايب السينيور (الدفعة الأكبر مني، اللي بيعلمني وبيأخذ بأيدي في أول فترات النيابة) وكنا عمالين نقرا في كتاب عظام، وهو ما شاء الله عليه كان عمال يشرحلي، أينعم مفهمتش أي حاجة منه بس كان شرحه جميل أوي (عشان هو غالبا هيقرأ الكتاب دا انما ف الحقيقة هو شرحه زى الزفت)



www.Mktbtk.uk

المطوة عليا وأنا والنايب السينيور وبيهوش المطوة في الهوا علينا عايز
يعور واحد ، ساعتها بس قررت أخذ موقف، أنت عبيط يله ولا
إيه! بترفع المطوة على السينيور وأنا موجود!

عشان كذا من غير ما أفكر، بجد ما فكرتش لحظة، قمت شايل
الكرسي الي كنت قاعد عليه وقمت حادفه ع النايب السينيور
بتاعي وطلعت أجري من الأوضة.

كان سينيور طيب والله

مات وهو نفسه يشرحلي بقية الكتاب

يلا مش مشكلة بقى أبقي أقرأه أنا وخلص

ملحوظة:-الي عملته دا مكنش ندالة والله ... دي كانت تاني
نبطشية ومكنتش أعرف السينيور أو تربطني بيه علاقة أوي...
فقولت لنفسي عادي... لو اتقتل بيقوا يجيبولي غيره بقا مش
مشكلة.

مكتبتك



Mktbtk.uk


www.Mktbtk.uk

الجيرة 2

(كان ممكن أعمل الفصلين في فصل واحد.. بس السقا
عمل الجزيرة 2 وأنا مش أقل من السقا)

دا الجزء الثاني من قصة البلطجي المجنون اللي هجسم عليا أنا
والنايب السنيور ف الاستقبال.. الجزء الأول ف الفصل اللي قبل دا
علطول، عشان اللي بينقي فصول عشوائية ومقراش الجزء الأول
يقراه عشان يفهم، مش عايز أسئلة ذكية.. أنا عمال أعالج السنيور
نفسياً لحد دلوقتي ومش ناقص.

المهم بعد منا بكل جرأة وشجاعة نفدت بجلدي من أوضة
العظام.. الراجل المجنون اللي كان عمال يخربش دماغه بالمطوة
ويعور ف نفسه ويخبط دماغه فالخيطه راح مثبت النايب السنيور
فالشيزلونج اللي ف أوضة العظام بالمطوة.



أنا أول ما طلعت روحت ناديت على الأمن بسرعة يجوا يتقنوا
السينيور عشان كان معاه الشاحن بتاعي، الأمن لما عرفوا إن فيها
مطوة فضلوا واقفين ع الباب بيحاولو يهدو البلطجي بالكلام
ويطالبوه بضبط النفس ... هاهنا اسودا! .. ضبط نفس إيه.. ما
تدخلوا تنقذوا اللي تقدروا عليه يا جدعان وهاتو الشاحن بطلوا
جُبن بقى!

ومع الصريخ العجيب بتاع الراجل المجنون، الناس اللي في
الطوارئ كلها اتلمت، عيانيين بقا وتمريض ودكاترة، كلهم طبعاً
بره الأوضة خايفين يدخلو، لحد ما دخل ممرض قديم قوي البنية
مفتول العضلات خد منه المطوة وسط انبهارنا عمل كدا إزاي،
ومن كتر انبهاري بيه قررت اعتبره السينيور بتاعي بدل السينيور
التاني اللي كان هيتغز بالمطوة بسهولة دا.

الراجل المجنون بعد ما اتاخدت منه المطوة فضل يضرب في كل
اللي حوالية بالأيد بس الأمن خلاص كانوا دخلو بسرعة مسكوه
كويس وراحو يعملوا بيه أشعة عشان نشوف حصل إيه لدراعه اللي
وقع من الدور التالت دا! في الأول والآخر دا مريض يعني، أينعم
مكناش فاهمين إيه الفيلم اللي هو عمله دا بس نظمن عليه الأول
وبعدين نشوف هنسلمه لأنهم قسم شرطة ولا مستشفى مجانيين.

المهم عمل الأشعة ورجع، شوفنا الأشعة ملقناش فيها حاجة،
فالسينيور حب يطمنه فقال له الحمد لله منيهاش حاجة، فالراجل

قعد يطلع أصوات غريبة ويزعق «مفيهاش حاجة إزاي يا ولاد ال
***** دا أنا واقع من الدور الثالث.. أنا لازم يتعملي جبيرة.. يا
مستشفى بنت *****.. انا لازم يتعملي جبيرة يا ولاد ال *****».

السينيور يسكت! ... أبدا... قالي اعمله جبيرة يا عاطف ...
طبعاً أنا مش أهبل.. كنت مستحيل أعمل جبيرة للمجنون دا أو
أقرب منه، عشان كدا عملت نفسي أهبل وقولت للسينيور: «يعنى
إيه جبيرة!!».. وأفنعتة إني مبعرش أعمل جباير مع إني عملت
في حياتي تقريبا حوالي ٢٤٣ جبيرة.. منها ٥٠ جبيرة كانت قدام
عينيه.. بس عشان هو طيب اقتنع بسرعة وعملها هو للبلطجي.

وخدوه الناس روحوه، خدوا البلطجي طبعاً، السينيور سابوه
ف الاستقبال عادي، وعدت النبطشية بسلام وعرفت من الناس
بعدها إن دا بلطجي ومدمن ومعروف جداً فالمستشفى وكل الغرز
والجروح اللي في إيده هو اللي عاملها لنفسه، لأ ولية مواقف من دي
كثير فالمستشفى بس الأمن بيخاف يمنعه يدخل عشان هو حاجة
زى زعيم البلطجية في المنطقة كدا! لا يقدروا يمنعه يدخل ولا
حد يقدر يسلمه للشرطة أو يشتكيه لأنه هيرجع ويتقم منه، حاجة
زي الأفلام والله بالظبط، أما بالنسبة للهبل اللي عمله ده ناس قالت
إنه مريض نفسي وناس قالو إنه ملبوس بجنية هي اللي بتخليه
يعمل كدا، والسينيور مقالش أي حاجة من ساعتها، اللي حصله
ماكنش سهل بردو يا حبة عيني .



- بقولك ايه يا سينيور

- نعم !

- هو كل يوم فيه بلطجية بتتهجم عليك فالمستشفى كدا؟

- كل يوووووم ... ماعدا يوم الأثنين ده الاجازة بتاعتي فيبطلعوا

يتهجموا عليا ف بيتي



مكتبتك



Mktbtk.uk

سكن الأطباء

سكن الأطباء.. هتقروا المصطلح دا كتير في الكتاب، ف كان لازم أوضحكلوا بعض النقاط الهامة للغاية، من كلمة سكن الأطباء كدا مع معرفتك إن المستشفى اللي روحتها متجددة وموجودة على النيل طبيعي إنك هتتخيل سكن الأطباء دا عبارة عن دور كامل فيه أوضة بمفتاحها لكل دكتور، أو سويت كبير لكل قسم مثلاً وكل سويت ليه حمامه وفيه مجموعة من السرير فائقة الراحة.

أنا بردو كنت متخيل زيكو كدا، لحد ما طلبت من السينيور أحمد كمال في أول نبطشية إنه ياخدني يوريني مكان سكن الأطباء عشان أحط شنطتي فيه وأغير هدومي وأخذ شاوري وألبس الإسكراب بتاعي وأنزل بدوافع وطاقة إيجابية لقضاء النبطشية الـ ٢٤ ساعة.

لقيت أحمد كمال خدني طلعتني الدور الخامس، وهو في طريقه للسكن لقيته فتح باب أوضة مظلمة كدا فيها سرير واحد وخمس

مراتب اسفنجية قديمة للغاية متآكلة سمكها في أحسن الظروف لن يتجاوز الـ ٣ سم، والخمس مراتب واخدين مساحة الأوضة كلها مفيش موضع لقدم لأن الأوضة كانت ضيقة جداً غير إن كان فيه دولابين كبار واخدين جزء كبير من المساحة.

السريز كان عليه جتتين وكل مرتبة على الأرض كان عليها جثة ما بتتحركش! فأنا سألت كمال قولتله هو دي المشرحة ودول جثث ناس ماتت؟ قالي يا بني دول دكاترة.. قولتله دكاترة ماتت؟

قالي يا بني لأ.. ماتت إيه.. دول نايمين بس كانوا نباطشين ٢٤ ساعة امبارح بس.. فسألته بكل اندهاش «طب المستشفى حسباهم فد الحجز هنا ليه؟.. هما عملو حاجة غلط؟.. قالي يا بني حجز إيه أنت مالك يا عاطف فيه إيه.. أنت مش قولتلي وريني سكن الأطباء! مهو دا السكن.. يلا ادخل.

أنا طبعاً اتصدمت وصورة سكن الأطباء اللي رسمتها أول ما لقيت المستشفى ع النيل وجديدة وبالسيراميك اتمدمت، معقولة دا السكن! فين البسين والبلكونة!.. فين السراير!.. طب ليه سمك المراتب أقل من سمك البطانية!.. وإيه دا.. هو النور مبيورش ليه كمان!

رد عليا أحمد كمال وكأنه اعتاد على الأمر: «شغل كشاف الموبايل يا عاطف وادخل حط شنتنك جوه وغير وانولي تحت بقى، اللنض بتاعت الأوضة بايظة من ٦ شهور».

قولتله طب خلاص استناني ع الباب ماتسبينيش لو حدي هنا،

ونورت كشاف الموبايل ومشيت وأنا بتحسس مواضع أقدامي بصعوبة خايف وأنا ماشى ناحية الدولاب أمشي على رقبة دكتور تحدير نايم أموته أو اتكعبل في أيد دكتور جراحة أكسرها أو أدوس على بطن دكتور أطفال فيزمر ويصحي النايمين، لحد ما وصلت للدولاب بعد حركات بهلوانية تشبه إلى حد بعيد باليه بحيرة البجع للحفاظ على حياة جثث الأطباء النائمة بعد تعب النبطشيات.

المهم وصلت للدولاب فتحتة لقيته بيفتح معايا عادي خالص، لقيته بقى مليون شنط ولبس دكاترة وكروكسات بالإضافة إلى غيارات داخلية شديدة الخصوصية لأحد الدكاترة أو كما يسميها البعض «كلوتات» فحشرت شنطتي بينهم (بين الشنط آه) وقفلت باب الدولاب ورجعت بنفس الحركات البهلوانية بس بصورة أسرع عشان كنت خلاص بقى اتدربت عليها وأنا رايح، ووصلت لكمال اللي كان مستنيني على الباب، بس رجعت وقولتله نسيت، قالي إيه تاني، قولتله عايز ادخل الحمام هو فين الحمام اللي ف الأوضة.. قالي لا مفيش حمام ف الأوضة.. قولتله طب اللي بيصحى بيروح فين؟ يفتح الدولاب ويتعامل جواه يعني ولا إيه!! قالي يا بني لأ الحمام ف الدور اللي تحتينا، وحمام بمفتاح عشان محدش يدخله إلا الدكاترة.

طبعا أنا سمعت كلمة حمام بمفتاح دي ورجعتلي تخيلاتي المريضة تاني، قولت دا يبقى أكيد حمام كبير بقى وبانيو وبخار وحوارات مدام بمفتاح، بس كمال كان سريع جداً في تدمير أحلامي لتاني مرة، نزلني بسرعة للحمام وفتحولي وقالي اتفضل.

دخلت لقيته مفيش مائة في الحنفيات أصلاً! ... آه والله ...
والشطاف بفتححه كدا لقيته بيعمل صوت ومبیطلعش مية! ...
ناديت لكمال من جوه قولتله المحبس فين الماية قاطعة.. قالي لا
دا هي اللي بايظة مش من المحبس.. إعمل حمام وظيفت أمورك
بمناديل لو معاك.

عملت حمام واستخدمت مناديل ورق كانت معايا واتصرفت
وطلعت لكمال قولتله: هو إنتو إزاي ساكتين ع القرف دا ... سكن
زي الزيت والنور بايظ فيه وقولنا ماشي.. إنما كمان الحمام اللي هو
المفروض أقل احترام للأدمية مفيهوش مائة! ... ابيسيهيه!

راح قافل باب الحمام بالمفتاح وقالي أنا نازل حصلني بقى دا
أنت يومك طويل شكله.

نزلت سألت على بتوع الصيانة وقولتلهم إن نور السكن مش
شغال بس إحنا بتتصرف ونشغل كشاف الموبايل إنما الحمام بايظ
ومفيهوش مائة دا كدا كتير.. لازم حد يصلحه دا أدنى حقوقنا إن
يبقى فيه مية فالحمام وزعقت معاهم.

وبالفعل.. ما ضاع حق وراه مطالب.. تاني يوم لقيت إزازة
سينا كولا اتنين لتر بلاستك مليانة مية ومحطوطة جنب القاعدة..
اللي هو يعني اتشطف بيها ومتوجعش دماغنا!

شكرا يا مصر

لسه فيه أزايز تاني ولا خلاص كدا يا مصر؟



عيل قالع يا ولاد الحلال



في يوم وأنا قاعد في أوضة استقبال العظام عمال ألعاب شطرنج
بخوافض اللسان لقيت عدى من قدام باب الأوضة سيادة مدير

المستشفى، أول ما لمحني قام داخلي الأوضة علطول، أنا قوتل جاي يشوف الشيزلونج المكسور اللي أنا قوتلته عليه اتصلح ولا لأ.. لقيته بيقولي مش لابس البالطو بتاعك ليه يا دكتور؟.. فقوتلته منا لابس سكراب أهو.. قالي مش كفاية.. فقوتلته ماشي، هبقى ألبس البالطو.. روح شوف كنت رايح تهبب إيه بقى الله لا يسيتك.

وبعد شوية لقيت داخلي واحد من البلطجية اللي «علوضعهم» اللي بيدخلولي كل يوم، وهو حاطط قميص مليان دم على راسه ومعاه أبوه اللي ميفرقش أي حاجة عن الأستاذ «أرنولد شوارزنجر» خالص، نفس الهيئة ونفس الجسم والعضلات المبالطة من كل حطة ونفس السحنة اللي تقطع المكرونة البشاميل من البيت.

أبوه دا أول ما دخل قالي: «الواد مضروب على دماغه بحديدة وغالبا اتكسرت» فأنا بتلقائية والله ما أقصد حاجة قوتلته: «الحديدة؟!!!!».. قام قافش عليا ومبرق وقالي: (هتهزر يا أستاذ!!!)، دماغه هي اللي اتكسرت وعاوزين نعمل «أوشاعة» نشوف هنجبسها ولا هنعمل فيها إيه!.. فأنا قوتلته الدماغ وعظام الجمجمة دى مابتجبسش.. دا غير إنها مش تبعنا.. دى تبع قسم جراحة المخ والأعصاب.. روح استقبال الجراحة الأوضة اللي بعد اللي جاية.

قام متخلي صوته عشان أخاف.. عبيط جدا أقسم بالله..



مايعرفش إني خايف منه أساسا من غير حاجة.. ولقيته بيقول: «طب
اعمله الإسعافات الأوليييييييية هتسييه كدا!!!!!!»

فأنا قولتله باباشا أوضة الجراحة بعدنا بومتر واحد والله.. والله
العظيم هما اللي بيستقبلوا الحالات دي.. قالي: «عليا الطلاق لو ما
قومت عملت الإسعافات الأولية لأصور قتيل فالمستشفى دي».
بصيت حواليا ملقتش غيري.. بصيت لجسمه وبصيت لجسمي
وافتكرت جسم عم سعيد موظف الأمن اللي بره (ربنا يشفيه)..
أيقنت إن أنا اللي هبقى القتيل.. فروحت قايم بكل كبرياء وعزة
لافف رباط شاش حولين دماغ إبنه وحالقله دقنه بالمره عشان
كانت طويلة.

وبعد ما بعته استقبال الجراحة وكشفت على كام حالة تانيين
قولت أطلع الدور اللي فيه الحالات المحجوزة بتاعت قسم العظام
عشان أمر على الحالات وكدا، بدور على التمريض المسئول عن
الدور ملقتش حد فيهم، مش عارف راحو فين! ملقتش غير عيل
صغير ملامح شبه الأستاذ أحمد موسى عنده بتاع سنتين لابس فائلة
قصيرة وبس!! مش لابس لا بنطلون ولا حاجة تحت البنطلون..
ولا حتى حاجة في رجله! لا وعمال يجري في الطرقة بتاعت الدور
بمتهى الإنسيابية وبلا هدف محدد!

حاولت أدورله على أم ولا أب ولا حتى بنطلون بلبسه في المكان
المحيط ملقتش، حاولت أشد التيشيرت اللي لابسه أنزله لتحت

السياحة أدب

فجأة الساعة ١٢ ليل وأنا وزميلي قاعدين في نبطشيتنا في استقبال المستشفى لقينا ممرض عمال يجري يلف على الأوض ويقول: «كله يستعد.. جالنا تليفون إن الإسعاف جاية ٨ أشخاص مصابين ووزير السياحة جاي معاهم» سألت ليه قالولي دول موظفين في احدى الوزارات الأتوبيس السياحي عمل بيهم حادثة وهم راجعين من مؤتمر لدعم السياحة!! ... متخيلين فكرة الحادثة!

عموما الممرض ملحقش يخلص كلامه وطلعت للاستقبال العام لقيت ظهرت كمية كراسي بعجل رهيبة، مع إن إحنا كان ما عندناش إلا كرسيين بعجل بس لنقل المرضى، واحد متكسر ونقدر نقول إنه من غير عجل، والثاني بعجل، بس نائب المدير واخده بيقعد عليه عشان مفيش كراسي.

ولقيت تمريض جديد ظهر، ودكاترة جديدة ظهرت، ورئيس قسم الجراحة جه، ورئيس قسم الباطنة جه، ورئيس قسم جراحة

التجميل جه، مع إننا معندناش قسم جراحة تجميل أصلاً! ...
معرفش جابوه منين!

المهم وأنا واقف جنب المدير وإحنا في انتظار الناس اللي
حصلهم حادثة يدخلو، لقينا دخل عدد ٧ كائنات حية شايلين
شنط بلاستك وحاجات وفيه منهم اللي لابس شبشب بصوباع
وماشيين في وسط طريقة المستشفى بلا مبالاة كدا، المهم دخلو من
الباب الرئيسي وفضلوا ماشيين في الطريقة لحد ما طلغوا مالباب
الي ورا، المدير سألنى مين دول.. قولتله إنت مش معانا فالدينا ولا
إيه يا باشا.. مش عارف مين دول؟.. قالي مين!.. قولتله عادي ناس
بتخرم من جوه المستشفى.. بدل ما تلف حواليتها.

طبعا المدير بعد الموقف ده قام ساحبله كرسي متحرك من
الكراسي الكثير وقاعد عليه، وقعدت ألف بيه شوية فالمستشفى
عشان ينسى اللي شافه.

وشوية والإسعاف جات وقامت منزلة كام واحد على أساس إن
دي الحادثة اللي إحنا مستينها من بدري، أبص الاقيلك كلها بلا
استثناء ناس نازلة صحتها أحسن مننا والإصابات بتاعتهم طفيفة
جداً مش مستاهلة القلبة دي كلها.

غير كدا عرفت إنهم راحو مستشفى ثانية قبل ما يجولنا،
وبعد ما خدوا علاجهم فيها واتعملهم اللازم، الإسعاف جابتهم
فالمستشفى بتاعتنا عشان نضيفه وجديدة ووزير السياحة والصحافة

والناس الي هتصور لما يجوا ينسطوا، الموضوع كله شو إعلامي يعني.

يكفي إني اقولكم إن أخطر إصابة فيهم كان واحد صوباع إيده متعور (أو بمعنى أصح فيه أوف).. راحو مقعدينه على كرسي بعجل فيه مليون مريض تاني في المستشفى في حاجة ليه!! آه والله.. الي هو شوية كمان كان ناقص ينزلنا واحد من الإسعاف نقوله مالك يقول مش عارف حاسس إني مأريف شوية.. فنقوم نجبله رئيس قسم الجلدية يلعب معاه كونيكت فور.. حاجة أقسم بالله مسخرة البرابير.

بس وبعد شوية جه وزير السياحة اطمن عليهم وأبدى إعجابه بديكورات المستشفى والكراسي بعجل وشكر كل الصحفيين الي كانوا موجودين وطمنهم إن كله ف الكلتش والوضع تحت السيطرة واتصور وهو بيحب المصابين، وأمر دكتور العناية إنه يسبب الحالات الخطيرة الي ف إيده ويفضل جنب الراجل الي متعور في صوباعه يتفخله ف الواو ا الحد ما تخف.

وخليناه مشي وقومنا ضارين العيال الي عاملة نفسها متعورة دي وخذنا الكراسي العجل بتاعتنا

مش هنهرج احنا



www.Mktbtk.uk

و
ب
ك



www.Mktbtk.uk

الفلوس الحلال ما بتضعش

موبايلي ضاع في المترو.. أو خرينا نتكلم بواقعية.. هو اتسرق مني في المترو.. طبعاً زعلت جداً!!!!!! عليه وكان يوم كئيب للغاية بالنسبة لي خصوصاً إني كنت حاسس بتأنيب الضمير عشان إزاي اتسرق كدا من غير ما أخذ بالي!

ومكنتش راضي اقتنع إن الطبيعي جداً إني اتسرق وسط الزحمة الشديدة دي.. ووسط الأستاذ سيد اللي حاطط مناخيره في ودي.. والأستاذ رأفت اللي بيطلع بخار مية من بؤه في نضارتي.. دا غير الأربعة اللي كانوا حاضنين بعض جامد أوي وحاضنيني معاهم وهما نازلين محطة الشهدا.. اللي يغيظ إني مش نازل الشهدا بتحضنوني ليه طيب!!

عامه استعوضت ربنا في الموبايل بقى والحمد لله على كل شىء.. بس كنت حزين جداً من جوايا.. لكن بقى شوقو القدر الجميل عشان الموبايل فلوسه حلال إيه اللي يحصل.. ألاقى فالنبطشيه

الي بعد سرقة موبايلي علطول ست دخلاي شايلة ابنها الصغير
الي شبه ألباتشينو العرب الفنان محمد رجب ذوال الستين ونص
وبتقولي الواد وقع على دراعه يا دكتور.. ف كتبتله أشعة فالست
راحت عملتها وجاتلي.

خدت الأشعة منها وشوفتها وقعدت أدور فيها على أي كسور..
أي شروخ.. أي موبايلات مسروقة «مهو شبه محمد رجب بقى لازم
أشك فيه».. المهم لقيت كسر بسيط كدا.

قولتها ابنك فيه كسر بسيط وهنجبسه.. فطبعاً زي أي أم مصرية
بدأت تفاصيل.. طب مينفعش نكتبله مضاد حيوي وخلص؟..
طب مينفعش نلفها برباط ضاغظ وخلص؟.. طب أنا عندي
مرهم جايلنا من السعودية أخضر كدا.. أدهنله منه وخلص؟..
طب فيه كلبة ف اوزباكستان بيقولوا البنها فيه الشفا مرضعوش
منها؟

وف النهاية لم تجده هذة الست العجيبة مفراً معي إلا إن ابنها
يتجبس.. فقالتلي ماشي بس جبسه كويس يا أستاذ.. قولتها..
ماشي:).

وبدأت أجبس الواد بهدوء.. الواد الي كان كل ما ألفه وباط
جبس على إيده كان بيحط إيده على الجبس المبلول ياخذ شوية
جبس ويحط ف بؤه.. يا بني يا حبيبي هتخلص الجبس!.. كفاية!
.. والله ما جنبنة براميلي!

www.Mktbtk.uk

وبعد ما عملت للواد ساندوتشين جبس يتأوت بيهم وبعد ما
اقنعت أمه إن الجبس لازم يبقى فوق الكوع مش على الحتة المكسورة
وخلص.. قدرت أنتهي من الجبس.. وما شاء الله عليا.. عملته
جبس جامد جداً.. كل دا وأنا حزين من جوايا على الموبايل اللي
اتسرق ومش متخيل في لحظة إنه ممكن يرجع تاني.. تخيلو بقى
بعد ما خلصت الجبس ولسة بعلق دراع الواد أبص الأقي إيه!..
أأقي الست بتحطلي خمسة جنية كدا متكورة ف بعضها ف جيبي
وبتقولي:(أشرب شاي)!!



مكتبتك



Mktbtk.uk

www.Mktbtk.uk



www.Mktbtk.uk

مهمة مستحيلة

في نبطشية من النبطشيات القمر الي الواحد بيشيلها، لقيت
دكتور الجراحة زميلي داخل عليا وبيقولي أنا خارج بره المستشفى
أجيب حاجة وراجع بسرعة.. ربع ساعة مش هتأخر.. وطلب
مني أخلي بالي من أوضة الجراحة عشان لو مريض جه ولا حاجة
اتصرف لحد ما يجي.

طبعاً أنا مافكرتش، قولتله لأ.. مليش دعوة.. إلا الجراحة يا
عم.. لااااااا شوف حد تاني.. طبعاً هو اندهش من أفورتي دي..
بس هو ما يعرفش إني متعقد من قسم الجراحة العامة دا من
زماااااااااااا.. بصوا.. هحكيلكو:

أول وآخر عملية نصب أعملها ف حياتي كانت بسبب قسم
الجراحة.. وكانت في فترة الامتياز.. بس كنت مجبر والله.
في بداية الامتياز بتاعي في مستشفى الجامعة كان أول شهرين عليا

جراحة.. المهم نايب الجراحة الي مسئول عني قالي اطلع مر على حالة فتحية ونوال فالعبر عشان أنا عندي عمليات كثيرة.. فطلعت علطول زي الأهل وأنا كلي ثقة مفعمة بروح المجدي يعقوب الي كانت مالية الدفعة كلها أيامها وإحنا فالحقيقة كنا لسة متخرجين ولا فاهمين أي حاجة فالمهلية أصلاً.. طلعت حتى من غير ما أسأله الحالات دي عاملة عمليات أيه.

وأنا طالع ع السلم قابلت واحد صاحبي ف سكتي.. قولتله تعالى يا اسطانمر بسرعة كدا على حالات الجراحة ونزل مع بعض.. قالي إسطة يا حبي تعالى وطلع معيا.

دخلنا عنبر الجراحة الي كان وقتها عامل بالظبط زي سوق التلات، أوضة واسعة مليانة سراير نايم عليها المرضى وقاريهم فارشين حصير وقاعدين جنبهم بأكل وحلل محشى كرنب وفاكهة ومنتجات البان .

المهم أنا سألت فين سرير فتحية فالي معاها قالولي إحنا أهو.. فروحت بكل ثقة اطمنت عليها وقيستلها الضغط وكله تمام.. وبعدين لقيت راجل عامل زي متوازي المستطيلات بجلاية وشنب كبير جدا!!!! يقولى:(الأوستاس تمرىض ولا ضاكتور؟).. فأنا بكل فخر و افتخار قولتله دكتور.. قالي أنت الي عامل العملية؟.. فمن غبائي قولتله آه قال يعني عشان أرسم نفسي.. مع أني مش عارف هى عاملة عملية أيه أصلاً.



فلقيت جوزها بيقولي طب إحنا عاوزين المرارة بتاعتها إحنا
مخدناهاش.. فأنا قولتله مرارة إيه!.. قالي المرارة الي أنت شيلتهاها
امبارح.. عاوزينها.

فأنا استنتجت إن العملية كانت استئصال مرارة.. فقولتله آه آه..
المرارة سيبتها فالعمليات عشان كانت مليانة حصوات.. فقام قالي
حشرات!!!... قولتله حصوات... حصوات.....ات... ولو عايز
تأكد إنها اتشالت ممكن تعمل سونار وهيبان.

قالي لا مش كدا.. أنا عاوز المرارة نفسها.. وقعد يتكلم كلام
كثير مفهمتش منه غير إنهم معندهم حاجة اسمها أعضاء حد
من عيلتهم تبقى مع حد غريب وإنهم حتى لما الدهشوري عمل
الزائدة السنة الي فاتت خدوا الزائدة بتاعته وهما ماشيين.. فأنا
قولتله والله مش هينفع اجيبها لك للأسف.

لقيت قام من عالخصيرة أربعة ميتخبروش عن الحاج وقالولي:(لأ
أنت هتجيبها).. فأنا علطول جيت ورا وقولتلهم طيب هي هناك
فالعمليات هروح أجيبها وآجي.. ورايح أمشي أنا وصاحبي عشان
نخلع من التوريطة السوداء الي ورطنا نفسنا فيها دي لقيت واحد
منهم راح ماسك دراع صاحبي وقاله لأ أنت هتفضل معانا لخدمنا
يرجع.. قصده عليا.

فأنا قولتلهم يا جماعة عيب كدا.. قالولي لأ عشان نضمن إنك

هترجعلنا بالمرارة، عشان إحنا هنصور قتيل الليلا دي لو المرارة
مارجعتش.. أنت تالت واحد يقولنا هجيب الزيت وآجيلكم
بسرعة ومانشوفش وشه تاني.. فماكنش قدامي غير إني سيبتهم
ومشيت وأنا مش عارف هعمل إيه.

طبعاً أنا كل اللي كان هاممني إزاي أخرج صاحبي من المأزق
اللي أنا حظيته فيه دا وبعدين أسيب قسم الجراحة ابن الـ***
دا خالص... فطلعت جري لنايب الجراحة الله يخربيته أقوله فين
أم المرارة.. ملقتهموش.. لقيته اختفى.. قعدت أدور على أي حد معاه
مرارة زيادة مش محتاجها مفيش.. طب أعمل إيه الله يجرقكو..
صاحبي رقبته هتطير بسبب ولاد الهبله دول.. دول كأنهم مخطوف
منهم عيل.. واخدين الموضوع على كرامتهم بشكل عجيب!

المهم وأنا عمال أفكر جدياً إني استعوض ربنا ف صاحبي.. لقيت
طفل برىء ف طريقة المستشفى ماسك كيس جيلي كولا ويلعب..
دخلت عليه إزيك يا غسل اسمك إيه؟ فالواد وشه اتخطف من
الباطو بتاعي.. وقالي وهو مرعوب: اسمي كريم.

فقولتله ماتخفش يا كريم هسيبك تلعب وهمشي.. بس ممكن
تديني واحدة مالكيس؟.. فالواد من خوفه أداني الكيس كله..
فخذت أتنين منه ومشيت.. كلت واحدة وروحت مبضط الثانية
جامد بأيدي ومغرقها بالبيتادين كأنه دم ولا ففها ف شاشا بيضا

www.Mktbtk.uk

و
ب
ك



www.Mktbtk.uk

55 إسعاف

في نبطشية جديدة من نبطشياتي في استقبال العظام، في أول اليوم كدا والدنيا هدوء لسه ومفيش مرضى، لقيت فجأة مدير المستشفى داخل عليا بخطوات سريعة متسارعة، أنا قولت ف نفسي «منا لابس البالطو أهو داخل ليه دا؟» لقيته مبصليش أساساً، دخل علطول ناحية الشيزلونج الي إحنا مبلغين إنه بايظ بقاله كام شهر وقام مختبر مرونة المرتبة الأسفنج الي عليه وقعد يضغط عليها بطريقة البطة اللعبة الي بتزمر، مش عارف بيعمل إيه دا وهي أصلاً مفسية! المهم قعد يضغط شوية وبعدين خرج مبسوط!.. استنيت بعد كدا ناس تدخل بمرتبة جديدة أبدا!!!!!!

شوية ودخلي أتنين مـ الإسعاف ومعاهم أتنين مصابين، كشفت على أول واحد سألت عن الحادثة بتاعته قالولي الموتسيكل وقع بيه وهو سايقه، خلصت كشف وروحت للمصاب الثاني أشوفه، قولتلهم دا جاي معاه في نفس الحادثة؟ قام المسعفين الأتنين ابتسموا

وبصوا لبعضهم كدا وهما مبتسمين.. قولتلهم إيه!! حادثة تانية؟
..قالولي لا دا إحنا خبطناه ف طريقنا وإحنا جاين.

المهم الأثنين المصابين طلعا كويسين الحمد لله مفيهومش أى
كسور، كتبت علاج للمصاب الأصلي ومشيته، والي هما خابطينه
كان فيه جرح بسيط كدا قولتله تعالى أقعد هنا عالشيزلونج أحطلك
بيتادين وغيار، فبتوع الإسعاف قعدوا يقولوله ألف سلامة يا حاج
والله ما كنا نقصد، إحنا مستينك أهو نروحك بنفسنا لحد البيت.

قالهم لأ أتكلواع الله إنتوا شوفوا شغلوكوا أنا ساكن جنب
المستشفى واتصلت بمراتي جاية، فقالوله: المهم متكونش زعلان
مننا وقامو بايسين راسه.. قالهم: إزاي دا إنتوا زي ولادي هو
نصيب.. اتكلواع الله يا حبايبي مع ألف سلامة.. فقالوله مع
السلامة في مشهد درامي مؤثر للغاية مكنش ناقصه غير الموسيقى
التصويرية بتاعت مسلسل المال والبنون.

هما مشيوا من هنا ولقيت الحاج بيسألني بيقولي ولاد ال***
دول اسمهم إيه يا دكتور عشان هعمل محضر؟ قولتله هتعمل
محضر!.. إنتو مش لسه متصالحين وبايسين بعض!.. قالي لا دا
عشان أفاجئهم بالمحضر مايكنوش رتبوا نفسهم.. أنت عارف
البلدي يا دكتور بقا.. المهم اسمهم إيه؟

فأنا طبعاً معرفش اسمهم لأن الإسعاف دي هيئة مستقلة بحد
ذاتها مش شغالين معنا في المستشفى زي الحاج فاكر.. فأنا قولتله

والله ما أعرف يا حاج.. قالي لا أكيد أنت عارف يا دكتور قول..
قولتله وربنا ما أعرف.. قام متنهد تنهيدة طويلة وقالي بص يا ابني
أنا موظف الشهر العقاري بقالي أكثر من ٢٥ سنة و.....و.....
وقعد يحكي لي بقى عن خبراته الكبيرة في المجال وفالحياة عموماً،
وحكالي عن حنكته في تربية أولاده وعن الأسطورة الأغريقية
ميدوسا وعن حاجات بالهبل ملهاش أي علاقة ببعض وأنا أقوله
ماشي يا حاج.. تمام يا حاج.. لحد ما قطعت عليه حديثه الي
كان مستمتع بيه وقولتله ممكن حضرتك تقولي النقطة الي عاوز
توصلها؟.. قالي أنا عايز أقولك إني مش بعد العمر دا كله هتضحك
عليا وتقولي إنك مش عارف أسماء الأثنين بتوع الإسعاف دول..
اسمهم إيه يا دكتور أنا مش ماشي إلا لما نقول؟.. فزهقت طبعاً منه
قمت ممليه اسم مدير المستشفى واسم واحد كمان كدا بشوفه ماشي
معاه علطول.

بس ومشي الحاج ولحلتاكو دكتور جراحة ماشي حزين كدا

ف الطريقة

قمت جايبه يحسس ع المرتبة الأسفنج بتاعتنا عشان نفسيته

نتحسن شوية

مكتبتك



Mktbtk.uk

www.Mktbtk.uk

و
ب
ك



www.Mktbtk.uk

الرجل السويتش

أى فيلم أو مسلسل يبقى ليه الموسيقى التصويرية أو الخلفية الموسيقية بتاعته الخاصة بيه اللي بتميزه عن أى مسلسل أو فيلم تاني، ممكن تكون مؤثرة، ممكن تكون لايت وكوميديا، على حسب نوع المسلسل يعني، أهو إحنا بقى كان عندنا كمان خلفية موسيقية بتميزنا برودو عن أى مستشفى عام في الكوكب كله، بس للأسف كانت خلفية مزعجة بنت ****.

حد هيسألني ويقول إيه الخلفية الموسيقية بتاعت المستشفى دي؟ جت منين؟؟؟... هقولكم إنها اللعنة التي لا تفارق المستشفى.. إنها الـ «كول سيستم» الخاص بالمستشفى «call system» أو كما يسميه العاملين بالمستشفى «السويتش».

في الأول هشر حلکم الكول سيستم الطبيعي في أي مستشفى عام يكون عبارة عن إيه وليه.. الطبيعي في أي مستشفى عام في مصر يكون فيه موظف اسمه موظف السويتش، ودا موظف يكون

مهمته فقط في حالة الطوارئ القصوى أو الحالات الي بتحتاج تدخل سريع جداً زي حالة توقف القلب أو حالة لسة داخله المستشفى خلاص هتموت أو بتقرب من الموت ف لازم تتلحق بسرعة والدكتور لو في أي مكان أو مع أي حالة تانية أقل أهمية يسيبها بسرعة ويتجه لمكان الحالة الي بتموت دي.

وهنا بقى بتيجني وظيفة فني السويتش، وهو قاعد في أوضته بيتكلم في المايك بتاعه يقول «على طبيب القلب (مثلاً) التوجه لاستقبال الطوارئ للأهمية» فكلامه دا يتسمع في كل أرجاء المستشفى في نفس اللحظة، لأن فيه ساعات موجودة في كل مكان في المستشفى متوصلة بالمايك الي معاه، بحيث لو الدكتور موجود في السكن يسمعها وينزل بسرعة، لو في أي غرفة فالمستشفى يسمعها وينزل بسرعة، لو في حمام المستشفى يسمعها ويتشطف بالإزازة وينزل بسرعة (معرفش بسرعة إزاي والإزازة بتأخذ وقت بس ما علينا) المهم صوت موظف السويتش بفضل الساعات المنتشرة هيوصل للدكتور أي كان مكانه.

موضوع إن موظف السويتش يطلب الاستغاثة العاجلة من الطبيب دا بقى ممكن يحصل مرة في النبطشية، مرتين في النبطشية، ٣ مرات بالكثير أوي لو النبطشية دي فقر وكلها حوادث وبلاوي سودة وخلاص يعني المباني عمالة تنفجر جنب المستشفى، إنما عندنا إحنا فالمستشفى ربنا أنعم علينا بموظف سويتش فريد من نوعه، فاهم السويتش ونظام الكول غلط، فافكره مثلاً نجوم إف إم، طول

اليوم عمال يتكلم ف المايك بصوته المزعج الي بيزعق دايبها، فتلاقيه طول ما أنت قاعد عمال من نفسه بقى يوجه رسايل للتمريض، بيناشد المرضى، بيهزر مع أصحابه ويسمع كل المستشفى، وكله كوم وإنه بيشغلنا في الأعياد أغاني دا كوووم تاني خالص، يعني عيد الأضحى تلاقيه مشغل الصبح في بداية اليوم «العيد فرحة»، رمضان يجي تلاقيه مشغل «رمضان جانا»، عيد الأم «أمورتي الحلوة بقت طعمة»، آه والله ما بهزر شغلها فعلاً في عيد الأم!

دا غير إنه قرر يقعد في أوضة المراقبة بتاعت الكاميرات الي المفروض إنه ملهوش أي علاقة بيها وقرر إنه يخليها جزء من شغله، فبقى يتفرج يتابع كل صغيرة وكبيرة بتحصل في المستشفى ويشوفها في الكاميرات ويعلق عليها في الكول ويسمع كل المستشفى، ويدي أوامر في حاجات هو ملهوش فيها أصلاً ودي مجموعة من النداءات الي سمعتها منه على سبيل المثال لا الحصر الي بتدل على إنه بيعمل abuse أو إساءة استخدام للكول سيستم:

= الأستاذ الي قاعدع الكونتر.. إنزل يا أستاذ مينفعش كدا

= العيال الصغيرة الي قاعدة الكونتر.. تنزل لو سمحتم مينفعش كدا (مش فاهم الكونتر دا كاتبه ف القائمة ولا إيه أنت مالك!!)



= ممرضة بنك الدم برجاء الردع التليفون

* ماردتش لأى سبب كان *

= الست الي معديه من قدام بنك الدم .. ادخلى قوليلهم يردو
ع التليفون (آه والله .. وصل بيه الأمر إنه يدى أمر لست معديه
فالطرقه عادي مبتشغلش فالمستشفى يعني مريضه أو جايه مع حد
تعبان)

= نتعامل مع بعض أحسن من كدا يا جماعة .. أى قلة ذوق من
أى حد أنا مش هسكت وهو عارف نفسه أنا فيا الي مكفينى (دا
مرة زهق على حد معين فقرر يزعق لكل المستشفى ف الكول)

= أم وليد .. الله على مسحك يا ست الستات .. إيه الحلاوة دى
(عمال يتفرج على أم وليد وهي بتمسح في أحد أماكن المستشفى
فالكاميرات وبيشكرها ف المايك كمان ... وغالباً «الحلاوة» عايده
على أم وليد مش المسح)

= نحب نهني السيد الدكتور محمد القرنفلي مدير المستشفى
بمناسبة عيد ميلاده أعاده الله على المستشفى بالخير واليمن
والبركات (أيوة قال كدا حرفيا وكانت تطيلة وسعت منه جامد
جداً .. بس حقه .. المدير سايبه يلعب بالمايك براحتة الصراحة .. دا
غير إن المدير قريبه أصلا ودا بيفسر إن مفيش حد قادر يكلمه)

= برجاء من موظف الأمن أشرف محمد بسرعة التوجه إلى غرفة
السويتش للأهمية القصوى (أشرف طلع قالنا بعد كدا إنه كان
باعته عايز سيجارة منه)!



أنا يا بنتي!!

في يوم جميل كتيب يشبه إلى حد كبير الأستاذة رضوى الشرييني، دخلتلي ست في منتصف الثلاثينيات باين عليها إنها معيطة، وجاية تشتكي من أيديها وضهرها.

سألتها إيه اللي حصل لإيديها قالتلي وقعت عليها، بس كان واضح إنها مضروبة بحاجة على أيديها مش شكل وقعة دي، قولتلها لأ إنتي مضروبة صح؟ قالتلي لأ وقعت عليها يا دكتور ولقيت عينها ابتدت تنزل منها الدموع، قولتلها على فكرة أنا مش بحقق معاكي أنا بسأل بس عشان شكل إيدك مضروبة بحاجة، قالتلي: آه جوزي ضربني بخشبة على أيدي وضهري.. وقعدت تحسبن عليه شوية وتشتمه.

المهم كتبتلها على أشعة وراحت تعملها، وبعد ما شوفت الأشعة طلع فيها كسر في أيديها، فأنا قولتلها إيديكي للأسف فيها كسر وهتحتاجي جبس، فقعدت تعيط، فقولتلها: «متقلقيش كسر بسيط إن شاء الله وكلها شهر ولا حاجة وتفكي الجبس.. ولو عايزة

نعمل محضر لجوزك.. الموضوع سهل.. عشان يحترم نفسه ويطل
غباء» فقالتلي: «أنا زهقت من العيشة دي يا دكتور.. دي مش أول
مرة يضربني.. أعمل الي أنت شايفه صح».

فقولتلها لا يبقى لازم عملي محضر بقى على الأقل عشان تخوفيه
ومايعملش كداتاني.. قالتلي ماشي.. فقولتلها أنا هكتبك تقرير
مبدئي في التذكرة وهتيجي الصبح إن شاء الله بقى تاخدي التقرير
النهائي.. قالتلي تمام.. فبعد ما عملتلها الجبس قعدت على الشيزلونج..
وأنا روحت قعدت على المكتب أكتب التقرير المبدئي في التذكرة.

وفجأة وأنا بكتب.. لقيت واقف ع الباب راجل على شكل
تلاجة.. حاجة ضخمة ومهولة جداً ما شاء الله ومخيفة.. فالست
أول ما شافته ودت وشها الناحية الثانية مقموصة.. فأنا استنتجت
إنه جوزها.. المهم الراجل قالها بصوته الفولاذي: «هو طلع فيه
حاجة ولا إيه!» فالست قالتله: «أيوة طلع فيه كسر وهقعد شهر
فالجبس.. والدكتور قالي لازم أعمل ليك محضر وأنا قولتلته لأ».



حلم عجيب

دائماً بسمع وبقراً عن الأحلام الي غيرت حياة أصحابها واستفادو منها وأفادو الناس كلهم، زي أينشتاين الي حلم بحلم ساعده في وضع النظرية النسبية، ومنديلوف صاحب الجدول الدوري بتاع الكيمياء الي فضل يدرس ويفكر في طريقة يرتب بيها العناصر الكيميائية وفجأة وهو نايم تعبان حلم بالجدول الدوري كله بترتيبه الحالي ف صحى من النوم كتبه على ورقة ونقشه زي ما شافه في الحلم بالظبط، ومؤسس «جوجل» الي قال إنه حلم إن هو وصديقه بيحطوا جميع المواقع الي على النت في الكمبيوتر بتاعهم الي كانت نواة لفكرة محرك البحث جوجل بعد كدا، وجميس واتسون مكتشف بناء الحمض النووي الي حلم بثعبانين متشابكين زي الـ DNA وهو نايم ساعده بعد كدا في وضع تصوره عن الحمض النووي، ومش فاكتر الشاعر مين الي حلم بقصيدة وصحى كتبها كسرت الدنيا وغيرهم وغيرهم كتييسير.

المهم أنا كنت دايمًا بسمع عن الحاجات دي وأقول ربنا يرزقنا بالأحلام بنت الناس دي، لكن أنا ليه بعد إحدى النبشيات اللي اتنفخت فيها أطلع أنام في السكن بتاعنا في المستشفى عشان استريح ف أحلم إنى متهم بجريمة قتل! والمقتول هو الفنان محمد رمضان!!

وليه أترمي في السجن في الحلم وأنا خايف ومش عارف قتلته ليه ولا إمتى ومش فاهم حاجة! حتى مش متأكد إنى برى!

وليه وكيل النيابة يطلع دكتور صاحبي اسمه عبد العليم بيحقق بالقضية وهو لابس اسكراب كحلي وبالطو أبيض وأنا واخده بجدية عادي جدا وماضحكش!

وليه اللي تبلغ عني فالحلم وتتهمني بقتل محمد رمضان تكون أختي!.. ليه ف الآخر تظهر برائتي وأفرح وأطلع من السجن ويفتحولي الباب الأقي محمد رمضان هو وبابا وماما وإخواني مستنيني وبيأخذوني بالحضن!.. محمد رمضان اللي مفروض اتقتل!

لا وبيوسني وبيقولي كنت متأكد إنك مش أنت اللي قتلتني وأنا احضنه عادي جدا مع إنى مبجهوش! وحاجات منيلة وعجبية كثير بس مش فاكرها أو فاكرها طشاش مش قادر أجمع تفاصيلها. بس تظل أعظم الحاجات اللي فاكرها من الحلم دا هي كيفية قتل محمد رمضان.. عارفين مين اللي طلع قتله!.. منى الشاذلي.. آه والله.. ولما عبد العليم صاحبي وهو بيحقق معاها سأها قاتها قتلتيه

إزاي؟.. قاتله إنها حطته سم ف إزازه المانيكير ومحمد رمضان شربها.. آه والله العظيم اتقتل كدا!.. والقضية اتقفلت عادي وصحيت!.

= خد إزازه المانيكير دي اشربها

_ ما أنا عارف إنني هشربها أمال هحطها على ضوافري بصوت غبي

منه فيه*

يا رب امتي هحلم حلم مفيد بقى

يا رب امتي هبطل الأحلام الهيلة دي

مكتبتك



Mktbtk.uk

www.Mktbtk.uk

و
>
CK



www.Mktbtk.uk

كفايك ممبر

معلومة (١):

من أهم أسباب خشونة الركبة عند الست المصرية هي زيادة الوزن.

معلومة (٢):

من أهم وسائل علاج خشونة الركبة وتحسين آلام المفاصل هي الريجيم وإنقاص الوزن، كل كيلو بتنقصه بيعمل تحسن ملحوظ جداً في الأعراض.

معلومة (٣):

من أهم أسباب وفاة أطباء العظام هي محاولة إقناع ست مصرية بتعاني من الخشونة بإنقاص وزنها، لأنها مش معترفة أصلاً إنها تخينة!

آه والله، أنا كنت فاكرا إني لما أسيب الوحدة الصحية واتخصص
عظام إني هبعده عن الستات بقى بتفاصيلهم بدوشتهم بس
اكتشفت العكس، إني دخلت جوه تفاصيل تانية أنيل وأنيل، بقت
الست تحبلي بخشونة وهي وزنها معدي الطن ونص وتزعل لو
قولتلها لازم تقللي وزنك وتبصلي من فوق لتحت، طب تتقمصي
من جوزك ماشي، إنما أنا الدكتور يا ولية أنا مالي أنا، أنا بقولك
النصيحة الطبية، وزنك زايد هقولك لازم تحسي عشان دا جزء من
العلاج مش عشان أنا عايزك سمبتك فالبيت وعودك يبقى زي
عود الفنانة منة شلبي!

يعني مثلاً ست في العيادة بتاعت المستشفى بقولها «وزنك زايد
يا مدام ولازم ينزل شوية».. لقيتها بتقولي:

- هو فين اللي زايد دا يا دكتور!!!

.. هو إيه اللي فين!!!.. أشاورلك على اللي زايد يعني ولا أعمل
إيه مش فاهم!

ست تانية.. «وزنك زايد يا مدام ولازم ينزل شوية»

- والله ما زايد يا دكتور.. دا كل دامية ماتخذ عيش

= يااااه.. أنا فعلا كنت انخدعت



www.Mktbtk.uk

و
ب
ك



www.Mktbtk.uk

معلش

قاعد في النبطشية في أمان الله لقيت داخل عليا واحد قالي وبكل ثقة: (لو سمحت كان فيه دكتور عظام هنا عندكو فيه شعر كثير ف إيده .. هو فين؟) .. فأنا استغربت طريقة الوصف دي أوي وبصيت لأيدي وقولتله: (طب ما إيدي فيها شعر أهو .. إيه الفرق بقى!!) .. قالي: (لا .. الثاني فيه شعر كتيسيسير)!!.. قولتله كثير كام شعرة يعني! فقالي باين اسمه محمد أو إبراهيم حاجة كدا.. قولتله بغض النظر يعني حضرتك عاوز إيه؟.. قالي إحنا محجوزين في الدور الرابع وعاملين عملية عظام لابن أختي إبراهيم محمد السملوطي في رجله .. كنا عايزين بس يا دكتور نغيرله الجبيرة عشان الجبيرة اللي موجودة دلوقتي مضيقاه.

فأنا قولتله خلاص شوية كدا وهطلع أغيرله الجبيرة من عينيا.. قالي ألف شكر يا دكتور وطلع فوق.

بعد شوية لما الدنيا هدبت فالاستقبال، طلعت الدور الرابع

روحتي للكونتر بتاع التمريض، لقيت مس «أم مازن» قاعدة بتاكل فول سوداني.. قولتلها إزيك يا مس.. قالتلي إزيك يا دكتور تعالي كل سوداني.. قولتلها معلش مرة تانية.. هو لو سمحتي الأوضة اللي محجوز فيها الطفل إبراهيم محمد السملوطي رقمها كام عشان عايز أروحله؟

قالتلي: «والله ما عارفة يا دكتور.. أفضل فتح ف الأوض أوضة أوضة وأنت رايح كدا لحد ما تلاقيه».. قولتلها بغض النظر عن الفكرة الاقتحامية الرائعة المستمدة من أفلام القوات الخاصة الأمريكية ولعبة pubg.. أنا مش عارف شكل إبراهيم أصلاً!.. هعرف إن دي أوضته إزاي لما افتح!.

قامت نافخة وسايبة السوداني اللي ف أيديها وقالتلي أمري لله.. أنا قولت هتقوم تيجي معايا.. لقيتها راحت فاتحة درج في الكونتر جنبها.. جنبها حرفياً.. ماتحركتش من مكانها.. مجرد بس اضطرت تشغل العضلات الباسطة للعضد والساعد الأيمن وتفتح الدرج.. وراحت مطلعة منه ورقة مكتوب فيها الحالات المحجوزة وأرقام غرفها، وقالتلي إبراهيم في أوضة ٤١١!!

روحتي بقى لأوضة الطفل إبراهيم.. لقيته عنده كدا بتاع ٩ سنين وعنده كسر في رجله.. وسألته لقيت الجبيرة مضيقاه فعلاً.. فقررت أغيرهاله وكنت جايب معايا حاجات الجبيرة من تحت من الاستقبال ومجهز كل حاجة.



www.Mktbtk.uk

و
ب
ك



www.Mktbtk.uk

عيد ميلاد هولاءكو



وأنا في سكن الأطباء شوفت بالصدفة لقاء جميل جداً على قناة نايل
دراما، يكفي إنى أقولكم إن الحلقة يحتفل فيها الفنان أحمد ماهر بعيد
ميلاده في البرنامج عن طريق إنه يقطع التورتة بسيف كبير!

آه والله زي ما إنتو شايفين كدا، طبعا الأستاذ أحمد ماهر من مدرسة الأفورة الجميلة بتاعت زمان، عشان كدا السيف دا كان حاجة من ضمن حاجات كتبيبيبيير أوفر في الحلقة.

الفقرة الأولى كانت فقرة الأقوال المأثورة وإبداعات المذيعة في كلامها عن أحمد ماهر:

= أول قول مأثور ليها كان: (طبعا زي ما قولنا لكم إن النهاردة مش عيد ميلاد أحمد ماهر، عيد ميلاده يوم ١٣ - ٨ بس إحنا قولنا نحتفل بيه ١١ - ٨ النهاردة عشان هو عاوز يحتفل بيه فالبيت مع أسرته).. وبعدين بكل جدية وإحساس إنها بتقول معلومة مفيدة قالت: (١٣ أو ١١ تمانية الأثنين بيقعوا في نفس الشهر طبعا).. يا سلام.....م... سبحان الله... الي هو بتحسسك إن ١٥ و ١٦ و ١٧ تمانية بيقعوا ف شهر سبعة!.

= ثاني قول مأثور ليها قالت: (الأستاذ أحمد ماهر بقا برج الأسد وهو برج بقى مش عايضة أقولكم.. نيعا.....!!) وقامت عاملة بأيديها كدا كأنها بتزأر!.. أيوة أيوة.. والعصفورة صوصو والقطعة نونو وليلة كبيرة أوي حضرتك.. بس هو لو لا قدر الله كان الأستاذ أحمد ماهر برج «الثور» كنت هتعبري عنه إزاي؟.. كتتي هتجري بدماغك ورا مساعد المخرج عشان لابس تيشيرت أحمر؟

وينجي بقى للفقرة الثانية وهي فقرة المداخلات الهاتفية من جمهور الأستاذ أحمد ماهر في أنحاء الكوكب:

= واحد اتصل قاله (أنا بحبك أوي يا أستاذ أحمد والله)... فأحمد ماهر بدل ما يقوله ربنا يكرمك ولا ربنا يخليك قاله علطول وش : (طب ما بتحضر ليش عروض مسرح ليه، دا أنا ليا جمهور عريض فالمسرح).. اللي هو بيحاول يشق زباين من المداخلات.

= واحد تاني اتصل بيه قاله : (أستاذ أحماااااااااااا... أزي حالك يا أستاذ أحماااااااااااا)، فأحمد ماهر قاله الحمد لله.. فقام سأله تاني : (عامل إيه أستاذ أحماااااااااااا).. فأحمد ماهر قاله تمام.. فقاله : (منور الشاشة والله يا أستاذ أحماااااااااااا).. فقاله أحمد ماهر : (ربنا ينورهملك يارب).. السؤال هنا.. هما إيه بقى اللي ينورهمله!!.. هو أي رد وخلص كدا!!

= واحدة تالته بقى اتصلت بيه وعيطت مش عارف ليه!!.. دا ذكرى ميلاده مش وفاته بصي إقفلني واتصلي تاني.

وبعدين بقى المذيعة خدت الأستاذ أحمد ناحية شاشة البلازما وقالتله دي الصفحة بتاعتنا اتفرج بقى على جمهورك وتعليقاته لما عرف إنك معانا النهاردة.. المهم هما عرضوا الصفحة على الشاشة ألقيلك إيه بقى.. ألقيلك بوستين عن أحمد ماهر فالصفحة واحد جايب ٧ لايكات والتاني جايب ١٣ لايك.. اللي هما أسرة إعداد الحلقة! حاجة مسخرة أقسم بالله.. لا والمذيعة بتظيط بقى وضاحكة على أحمد ماهر ومفهامه إن الفيسبوك كله اتقلب لما عرف إن النهاردة عيد ميلاده!.

www.Mktbtk.uk

بس وبعد كدا بقا الأستاذ أحمد قطع التورته بتاعت عيد ميلاده
بالسيف نسبة إلى مسلسلاته التاريخية المأفورة، وبعدين لقيتهولك
عمال يبصع البلالين اللي مرمية ع الأرض ف الأستديو!

يا ابراهيم

هاتلي المنجنيق مع ع المكتب

أنا فرحان وعاوز أفرقع كل البلالين دي دلوقتي



مكتبتك



Mktbtk.uk

www.Mktbtk.uk

زراعة النخاع في غير موسمه

النهاردة مكنش يوم عادي، إنه اليوم الي الوزير حدده عشان يجي يفتح فيه وحدة زرع النخاع عندنا في المستشفى، عشان كدا طبقاً لتعليمات المدير روجت ضارب الباطو ومعلق الـ ID ولابس الكروكس الفسفوري ناصع الفسفرة ف رجلي، وبصراحة الحاجة الوحيدة الي كانت بتاعتي من الحاجات دي كلها كانت رجلي، عشان الباطو والـ ID والكروكس الفسفوري طلعت جبتهم الصبح من سكن دكاترة الجراحة، منا مكنتش أعرف إن الوزير جاي، ولا كنت أعرف بردو إن فيه دكتور جراحة بيلبس كروكس فسفوري! إيه الهيافة دي!

المهم بعد ما لبست الزي المفضل عند المسئولين ف وزارة الصحة وقعدت أنا وزميلي والأخصائي بتاعنا فإستقبال العظام في انتظار وصول سيادة الوزير، لقيت نائب مدير المستشفى والمسئول عن مكافحة العدوى داخل علينا وهو ماسك علبة بيرسول وعمال يجري بنفسه ورا دبانة وحيدة مخنثة في أرجاء الغرفة عندنا وبيرش

عليها يرسل بمنتهى العنف!

وبعد ما خلع تلت تربع علبة اليرسول ورشها كلها وإحنا
جوه الأوضة، إحنا اتقلبنا على زهرنا وموتنا، والدبابة فضلت
عايشة عادي، مما أصابه باليأس فشرب الباقي من اليرسول عشان
ينسى وطلع يدور على دكاترة تاني يموتها.

شوية ولقينا داخل علينا مدير المستشفى، سألنا فيه عمليات
عظام النهاردة، قولنا له لأ مفيش.. قال إزاي!! الوزير ممكن يمر
عالعمليات.. اتصرفوا ودخلوا أي حالة دلوقتي أهو!.. آه والله
طلب مننا الطلب العجيب دا!.. وكأنا مطبقين المرضى وعابنهم
فالدولاب! MAKTABTK

وعشان إحنا صعب نروح نكسر مواطن مصري برئ من قدام
المستشفى ونجر جره من رجله ونسحبه عالعمليات، روحنا استلفنا
عيان عنده كيس دهني من قسم الجراحة العامة، أهو بدل ما
الكيس الدهني ملهط ودهني كدا ف نفسه، ثبته إحنا ف جسم
العيان بشرايح ومسامير.

وبعدين قالوا الوزير وصل، فطلعت أشوف، لقيت العمال
يرشوا معطرات جو بالهبل ف الطريقة اللي في مدخل المستشفى
عشان الوزير لما يدخل يتنعش، ولقيت الكول سيسم اللي
مغطي المستشفى والمفروض بيستخدم ف النداء عالآطباء في حالة
الطوارئ القصوى مشغلين عليه موسيقى هادية ليتهوفن! قال

www.Mktbtk.uk

يعني كدا بقت مستشفى جرايز أناتومي العام! ماكنش ناقص غير
إنهم يفهموا الوزير إننا بنستقبل المرضى عندنا بالبلوتوث!

بس ودخل وزير الصحة وصدق ريحة المعطرات اللي شمها
واقتنع إنها ريحة طرقة المستشفى الطبيعية.. مع إن طرقة المستشفى
فيها حمامات.. يعني لو الناس بتبرز ورد بلدى أكيد مش هتبقى
الريحة حلوة ومعطرة كدا!... وطلع افتتح وحدة زرع النخاع
ومشي.. قال زرع نخاع قال.. هو إحنا عارفين نزرع قمح لما نزرع
نخاع!!.. إحنا هنهرج!

= (المدير): الوزير مشي يا جدعان.. يلا شيلو محلول الكريم
كراميل اللي معلقينه للمرضى فالطوارئ.. وهاتولي الكروكس
الفسفوري اللي فارجل الواد دا عشان بتاعي

مكتبتك



Mktbtk.uk

مكتبتك

مكتبتك لعمل الكتب اندرويد ورفعها على جوجل بلاي

كتب معرض الكتاب على موبايلك اثناء المعرض

يمكنك طلب اي كتاب على جوجل كتب فقط برربع الثمن

ان اردت رفع كتاب لك يمكن ان ترسل لنا على صفحتنا
على فيس بوك (مكتبتك) او (Mktbtk.uk)

يوجد ايضاً افلام ومسلسلات بدون اعلانات على موقعنا

www.Mktbtk.uk

www.Mktbtk.uk



www.Mktbtk.uk

تمية بشرية

لو أنت فاطر نفسك الدنيا مقفلة معاك ومعنداك وبتحاربك أحب أقولك إن فيه نايب عظام زميلنا وصديقنا استلم جديد في المستشفى اسمه شاكر (مقولتش اسمك ثلاثي أهو في الكتاب يا شاكر زي ما وعدتك).. المهم شاكر وهو رايح يقدم جواب الاستلام بتاعه في الإدارة الصحية، دخل أوضة شئون العاملين لقي الوظائف والموظفين عمالين يصوتوا ويلطموا وملومين حولين موظفة تانية واقعة على الأرض، فراح سأل حد فيهم لو سمحت أنا عاوز أمضي ورقة الاستلام دي، قالوله تمضي إيه الموظفة ماتت أهو.. آه والله.. الموظفة اللي هتسلمه الشغل ماتت وهو داخل!!

شاكر مياأسش.. جاهلم تاني يوم.. وخلص ورقة الاستلام وجالنا المستشفى.. في نفس اليوم اللي استلم فيه عندنا، الوزير طلع في التلفزيون وصرح بأن المستشفى بتاعتنا هتتحول لمستشفى أورام متخصصة.. يعني كدا خلاص مبقاش فيها تخصص عظام وهنترمي كلنا ف الشارع.

www.Mktbtk.uk

شاكر برردو مياسش.. قرر يكمل فيها لحد ما تتحول أورام
وحضر يوم في العمليات معايا.. كان من أغرب الأيام في الدنيا..
العملية المفروض بسيطة واتعملت كتير وتخلص في ساعة زمن..
فضلنا أنا والأخصائي والسينيور شغالين فيها ٥ ساعات.. وفي
الآخر شاكر زهق وسابنا وراح يتغدى.

خلصنا وطلعنا سكن الأطباء عشان ننام بعد يوم طويل.. شاكر
ماكنش عجبه السكن.. قال السكن دا إزاي مفهوش تلفزيون..
تاني يوم قناة ميكي قفلت!!

الاسم_رباعى: شاكر إبراهيم عبد الحميد كامل

= شاكر بقولك ايه ماتيجى أفرجك على مدير المستشفى كلنا

بنجبه



www.Mktbtk.uk

ماهى نقاطك يا هبة

في ظهر أحد النبطشيات الكبيسة في استقبال العظام والي كان فيها حالات بالهبل منذ بدايتها، لدرجة إن فيه حالة دخلتلي مرتين، هي نفس الحالة والله، المرة الأولى لقيت واحد من الأشباح كدا داخل ماشي عادي خالص على رجليه وبيقولي ركبتني بتوجعني بقالها أسبوعين عاوز أعمل «أوشاعة».

قولتله إحنا دلوقتي استقبال طوارئ وإسبوعين مش حالة طوارئ، تعالى بكرة الساعة ٩ الصبح في عيادة العظام بتاعت المستشفى اللي في المبنى الثاني مش هنا، قعد يرطم بالكلام وعاوز يخليني أعمله أشعة بالعافية.

فهمته تاني، قولتله إحنا هنا طوارئ استقبال وانك حالتك مش طوارئ عشان بقالها إسبوعين فمكاتها في العيادة في المبنى الثاني ودا وقتها خلص لأنها بتبتدي ٩ الصبح وبتخلص ١٢. الساعة دلوقتي ١، فهتيجي بكرة الساعة ٩ وهيعملوك اللي أنت عاوزه.

قالى لأ أنا عاوز أعملها دلوقتي بقا مليش فيه أزميلي ..فقولتله مفيش أشعات يلا اتكل ع الله فيه حالات تانية غيرك مش فاضي للتهريج دا.. ففعد يزعق ويشتم في الدكاترة والمستشفى وبعدين مشي.

بعد نص ساعة تقريبا.. لقيته قالع الجاكت الجلد اللي كان لابسه وسايب التيشيرت اللي تحته وجايب شعره الطويل على جنب كدا مغير تسريحته وداخلي تاني (على أساس إني مش هعرفه بالطريقة دي بقى وسط الزحمة وكدا).. ولقيته بيقولي «ركبتى بتوجعني بقالها أسبوع وعايز أعمل أوشاعة» طبعاً أنا مضايقينش تنكره ومحاولة استعباطه ليا قد ما ضايقني غبائه.. يا بني ما هو «من أسبوع» بردو ماتعبرش حالة طوارئ!.. إيه الغباء دا!.. روح وتعالى ٩ الصبح بردو يا غبي.. دا أنت مفيش في ديك مخك رجا.

بجد والله غلب الأستاذ «طارق علام».. الأستاذ طارق بردو كان جايب في برنامجه مرة تقرير عن أصغر مدمن ومجرم في مصر.. عيل عنده ١١ سنة.. المهم هو استضاف الواد عشان يعمل معاه حوار وعمل لغوشة بالفوتوشوب كدا (blurring) على وشه عشان يخيبه ومحدث يتعرف عليه على أساس إنه يحافظ عليه عشان لسة صغير وكدا.. بس ف نفس الوقت ساب وش أبوه اللي جنبه عادي وقال اسمه واسم أبوه وعرف الناس هو منين وأبوه بيشتغل إيه وفي محافظة إيه، وفي سياق الحديث ذكر اسم القرية اللي جنبهم كان.

المهم وسط تعبى فى النبطشبة دا كله لقت اتصال على موبايلى
جايلى من الأخصائى بتاع اليوم الدكتور أحمد وفا وقالى إنه اتبلغ
إن أنا وهو مطلوبين للتحقيق فى الشئون القانونية بتاعت المستشفى ..
قعدنا نفكر ونخمن يا ترى إيه الجريمة اللي ارتكبتها!.. ملقناش
إجابة!.. فقولته خلاص .. أففل أنت يا دكتور أحمد أنا هطلعهم
دلوقتى قبل ما يخلصوا أشوف عاوزينا ف إيه .. ومتقلقش خالص
خير إن شاء الله .

قفلت معاه وطلعت للشئون القانونية .. سلامو عليكم .. هنا
الشئون القانونية؟ .. قالولى أيوة .. قولتلهم الدكتور أحمد وفا هو
السبب حضر تكم وهو المسئول على النبطشبة وأنا نايب ومليش أي
دخل بأي حاجة .. ابعتهم لكو؟

قالولى استنى بس أنت مين؟ .. قولتلهم أنا أحمد عاطف نايب
عظام ومتحول للتحقيق أنا والأخصائى .. قالولى طيب وفين
الأخصائى؟ .. قولتلهم الأخصائى الدكتور أحمد وفا بيقولكو
هو السبب وهو المسئول على النبطشبة وأنا مليش أي دخل بأي
حاجة .. قالولى استنى بس وقامو فاتحين ملف كدا ومطلعيني ورقة
كبيرة وشكلها مهمة .

وقالولى الدكتورة هبة الصيدلانية كاتبة فيكو إنتو الأثنين مذكرة
عشان بتمضوا على التذاكر بتاعت عيادة العظام بالاسم ثنائى مش
ثلاثى .. طبعاً أنا اندهشت جداً!.. قولتلهم الدكتورة هبة سابت

www.Mktbtk.uk

المشاكل والعجز الي عندها في الأدوية وتوقيع عبد الله السعيد
لنادى بيراميدز ولعبة الحوت الأزرق وجواز شيرين من تامر
حبيب وضربة جزاء ريال مدريد قدام اليوفي وحولتنا للتحقيق
عشان مابنمضيش ثلاثي!.. قالولي آه وإن شاء الله هتاخذو جزا.

مكتبتك

#بعد اسبوع

= أنت مطلوب للتحقيق تاني أنت والدكتور أحمد وفا.. الدكتورة
هبة كتبت فيكم مذكرة وبتقولكم اسمه حسام حبيب مش تامر..
تامر دا سيناريست

مكتبتك



Mktbtk.uk

www.Mktbtk.uk

الله يخبريتك يا سهير

ربنا ما يكتب عليكم قريب مريض عاشق للأسئلة الوجودية
أبدأ يا جماعة، في إحدى النبشيات ربنا اختبرني بقريب مريضة
لسه عاملة عملية شرايح ومسامير يومها ومحجوزة وكل دقيقة
ينزلي الاستقبال وأنا عمال أشوف حوادث وكسور ويسألني أسئلة
تفقع المرارة بجد.. حاجات من نوعية «سهير نامت نظفي النور
ولا نسيه؟».. وبعدين يطلعها فوق وشوية تاني والاقبه خارجي
من جيب الأسكراب وأنا بجبس حالة ويقول «سهير صحيت
وعطشانة نشرها؟».. قولتله أه شرها هو إحنا معتقلينها شرها!!!!!!

طلع وبعدين شوية ونزلي.. قالي شرناها مية خلاص.. قولتله
تمام.. قالي عايزين نجبلها عصير.. نجبهولها بأيه؟.. قولتله أي
حاجة مش هتفرق.. قالي لا قول رأيك الطبي يا دكتور.. نجبلها
عصير بأيه أكيد هيفرق طبعاً.. استجمعت قوايا الداخلية وقولتله
هاتلها عصير بالخوخ.. وطبعاً دا مش بناءً على رأي الطب.. لا دا
رأيي أنا الشخصي.. أنا اللي بحب الخوخ.

المهم طلع شربها الخوخ.. يقعد يتهد بقي؟.. لأ طبعاً.. نزلي تاني وأنا بشوف حادثة على ترولي لقيته مطلع راسه من تحت الترولي وبيقولي: «يا دكتور».. قولتله نعم.. قالي «كراوية ولا حلبة؟».. قولتله كراوية.. مع إنى أقسم بالله ما أعرف الكراوية ولا كلتها ف مرة.. شوية ونزلي تاني «دكتور.. لون البول فالقسطرة أصفر».. قولتله أمال أنت عاوزه إيه يا محمد؟.. قالي أنا معرفش أنا جيت أقولك بس.. قولتله عادي يا محمد متخفش أطلع.. البول الأصفر فالقسطرة خير.

وطلع المرادي بقي وغاب فترة ولقيته نازلي الساعة ثمانية ليل بيقولي حريفياً بالنص كدا: «دكتور سهير جعانة نأكلها ولا نستنى لما نفسي».. قولتله اسمها تطلع ريح يا محمد أفاضك.. وبعدين متخفش يا محمد أكلها إحنا مش محتاجين الريح فحاجة... دي بتبقى مهمة في عمليات الولادة والجراحة بس... أطلع أكلها وابتدى بحاجات خفيفة كدا.. فقالي: «مع احترامي لكلام سيادتك بس أنا هستنى الريح أضمن يا دكتور.. مش هتموت ما لجوع يعني».. قولتله ماشي ومارضيتش أدخل معاه في جدال عشان مكتش قادر.

وطلع فوق وبعد ساعة لقيته داخل عليا بكيس سوبر ماركت مليان حاجات.. عرفت إن كدا سهير الحمد لله فست.. وقام مطلع علي حاجتين بيقولي «أأكلها البسكوت دا ولا دا يا دكتور؟» أنا اللي نقطني بقي المرادي مش السؤال.. اللي نقطني إن الأثنين كانوا ويفر.. واحد شمعدان والتاني لمبادا باين.. اللي هو تقريبا مفيش فرق بينهم إلا

الكيس.. بس أنا استجمعت قوايا الداخلية بردو كالعادة وابتسمت وشاورتله على واحد فيهم يأكلهوها عشان أخلص.. قالي وجبتها زبادي كمان.. قولتله زي الفل أوي يا محمد اطع أكلها بقى.

وطلع محمد وسابني ومنزلش خالص الحمد لله.. وفضلت أكشف على حالات وحوادث لحد ما توفيت إكلينيكاً على الساعة اتنين ونص بليل كدا والدنيا هديت خالص وبقت زي الفل.. فقولت انتزها فرصة بقى واطلع أرحلي ساعتين عشان النبطشية ٢٤ ساعة وأنا من ٨ الصبح متدمر.. طلعت سكن الأطباء ويدوب حطيت راسي عالمخدة روح فالنوم مالتعب.. لقيت باب السكن بيتفتح عليا وواحد طويل فالضلمة عالباب بيقولي الدكتور أحمد عاطف هنا؟.. قولتله أيوة مين!!!!... قالي أنا محمد أخو سهير وراح مشغل النور وقالي «أنا نزلتك تحت الاستقبال قالولي طلع فالسكن... ينفع نأكلها فراخ دلوقتي بقى يا دكتور؟».

فسيقتي واستريحتي يا سهير!

فسيقتي واستريحتي يا حبيبتي!



www.Mktbtk.uk

و
ب
ك



www.Mktbtk.uk

مكتبتك واوا

مرة في يوم كنت قاعد أنا وزميلي محمد التلاوي ومعانا بقى
السينيور الكبير بتاعنا الدكتور أحمد كمال القائد الأعلى للنبطشية
والي معلمنا كل حاجة جديدة في عالم العظام، المهم دخلنا راجل
عنده كسر بسيط كدا في آخر عقلة في صوباع إيده، المهم السينيور
أحمد كمال شاف الأشعة وقرر إننا هنبثله الكسر بسن سرنجة،
ودى طريقة شائعة بنتبث بيها النوع دا من الكسور.

فالزميل محمد التلاوي الي كان معانا في النبطشية قال لكمال أنا
عاوز أعملها معملتهاش قبل كدا، فالسينيور أحمد كمال تقمص
دور المعلم رشدان بتاع سحالف النينجا وقال للتلاوي: (تعالى
أعملها وأنا هقف جنبك) لا وقالهاله بطبقة صوت أوفر جداً،
تحسسك إنه هيقف جنبه في محنته مثلاً ولا حاجة، لدرجة إنني كنت
عاوز وهما بيتكلموا أعملهم بيؤي الموسيقى التصويرية بتاعت
سوق العصر من كتر ما هما أوفر، دا في الأول والآخ بسن سرنجة
يا جدعان، ليه نكبر الموضوع كدا!

www.Mktbtk.uk

لوحدي، شوية وأقيلك مين بقى، أقيلك شاكر داخل عليا
أوضة العظام وهو بيقلني: «ألحق.. الست الكبيرة اللي كنا بنعملها
العملية إمبراح بتموت فوق»

الله يخربيتك أنت ايه اللي جابك!

أنا مش قولتلك أقعد ف البيت متجيش خالص واحنا هنمضيلك!



مكتبتك



Mktbtk.uk

www.Mktbtk.uk

و
ب
ك



www.Mktbtk.uk

الوهاب بيتخانق مع رضا مدبولي والمرافقين للحالتين ماسكين ف بعض عشان السرير اللي جنب الشباك.. فتعالى اتفضل اطلع حل المشكلة.

طبعاً أنا بر دو مصدقتش إن ممكن أتنين مرضى ناضجين كل واحد فيه اللي مكفيه يتخانقوا على سبب كدا!!.. يعني سليمان عبد الوهاب دا رجليه مكسورة ومحجوز عشان هيعمل عملية ف رجليه.. ورضا مدبولي محجوز عشان عنده كسر في دراعه ومحتاج شرايح ومسامير.. يعني الأثنين المفروض عندهم أسباب كافية جداً إنهم يذهبوا في الحياة الدنيا وملذاتها وشهواتها والسرير اللي جنب الشباك!!.. بس بعد حلفان مس روحية قولت لازم أطلع أشوف إيه اللي بيحصل بالظبط.. عشان كدا قولتلها اطلعي إنت يا مس وقوليلهم الدكتور طالع ورايا أهو بالخرزانة.. أنا جليلهم بقى أشوف إيه لعب العيال دا.

خمس دقائق بعد ما كشفت على حالة طوارئ كانت معايا.. طلعت بقى فوق الدور الرابع ولقيت فعلاً زي ما المس حكيتلي بالظبط.. سليمان عبد الوهاب عمال يشتم ف رضا مدبولي.. ومدبولي عمال يشتم ف عبد الوهاب.. والمرافق اللي مع عبد الوهاب عمال يشتم ف المرافق اللي مع مدبولي والمرافق اللي مع مدبولي عمال يشتم ف المرافق اللي مع عبد الوهاب وهيصة جامدة جداً!!!!. دخلت الأوضة قمت مزعق فيهم بقى.. وطلبت من المرافقين

الي معاهم يطلعوا بره لحد مبقاش في الأوضة غيري أنا وسليمان
ورضا ومس روحية.. ابتسمت ابتسامة الدكتور مجدي يعقوب
بتاعت الإعلانات دي ليهم هما الأثنين على أساس ابدأ نقاش ملئ
بالود والحنان معاهم ونسمو بخلافتنا لـ منطقة جميلة وقولت لهم إيه
المشكلة بقى فيه إيه؟

رد عليا سليمان عبد الوهاب وقالي: إحنا امبارح كنا في أوضة
تانية يا دكتور ولما الأوضة دي فضيت النهاردة.. التمريض قالنا
يلا تعالو اتنقلوا أوضة ١٢.. مينفعش أبقى أنا محجوز قبله يا
دكتور والأستاذ دا (يقصد مدبولي) يجي يقعدلى جنب الشباك ع
النيل وأنا لأ.

= رضا مدبولي: هو إيه الي محجوز قبله.. أنا الي اتنقلت أوضة
١٢ الأول واخترت السرير دا خلاص بقى بتاعي

- سليمان عبد الوهاب: يا سلام.. هو الي اتكسر يوم ١٤ ف
الشهر زي الي اتكسر يوم ١٣؟

= رضا مدبولي: أهو عافية بقى إذا كان عاجبك.. ورحمة أمي ما
قايم من ع السرير إلا على جثتي

- أنا: يا جماعة اهدوا إنتوا كبار مينفعش كدا!

= عبد الوهاب: يا دكتور حتى بالنسبة لحالتي أنا عندي كسر
في رجلي.. هو في إيده.. يعني هو سهل يتحرك ويقوم من السرير

يتمشى يشرب سجارة وأنا لأ.. أنا محتاج أبقى جنب الشباك أغير جو.. أشرب سوجارة.. أبص منه.. أي حاجة تسلينى يا دكتور.

- أنا: تشرب إيه!.. إنتو بتشربوا سجائر في المستشفى!!!

= عبد الوهاب: ما كله بيشرب يا دكتور وبعدين مش دي مشكلتنا دلوقتي.

- أنا: خلاص يا رضا الراجل بيقولك مكسور في رجله ومش قادر يتحرك ومحتاج الشباك.

= مدبولي: وأنا مكسور في إيدى ومبقدرش أهوي بأيدي من الحر ومحتاج الشباك بقى.

- أنا: هو فين المراوح؟

= مس روية: المدير لمها كلها الأسبوع اللي فات.. بيقول عهدة وغلط نسيها في أوض المرضى.

- أنا: طب يا رضا.. بلاش عشان رجله.. عشان أنت الكبير يا أخي واعتبر دا أخوك الصغير وشبطان في الشباك.

= مدبولي: مهو عشان أنا الكبير عيب أوى لما عيل صغير زي دا يقومني من فرشتي.

- عبد الوهاب: أهو أنت اللي عيل صغير أنت وأهلك والي جابوك.



= مدبولي: تصدق إنك راجل ما تربتش.

- عبد الوهاب: وأنت راجل معندكش ريحة الدم.

= أنا: هو بجد فين المراوح يا مس؟

- مس روحية: يا دكتور قولتلك المدير لها الأسبوع الي فات..

يقول عهدة وغلط نسيها في أوض المرضى.

= أنا: هي مش المروح دي المفروض جاية المستشفى عشان

المرضى أصلاً!

- مس روحية: أيوة

= مدبولي: لو سمحت يا دكتور أنت شايف أهو قلة أدبه.. لو

سمحت طلعه من الأوضة.

- عبد الوهاب: هو مين دا الي يطلع من الأوضة... *صوت

غير مستحب يصدر من الأنف*.. أنا جاي قبلك المستشفى أنت

أهبل ولا إيه!

وابتدت تصدر شتايم بالأب والأم والأخ والأخت والأهل

والأقارب والأحباب والموضوع اشتعل وصوتي مبقاش مسموع

ودخل المرافقين وشاركو في الكرنفال السافل الجميل ومس روحية

همست ف ودني قالتلي يلا بينا يا دكتور عشان هنضرب دلوقتي.

طلعت طبعاً اتصلت بالأمن طلعا من تحت ليهم وخليتهم

يتنقلوا من الأوضة الي ع النيل للأوضة الي كانو فيها الأول

www.Mktbtk.uk

وقتلهم لو حصل مشكلة من حد تاني هكتبله على خروج إجباري من المستشفى لعدم اتباع التعليمات.. هو مفيش حاجة اسمها كدا بس أنا ألفتها عشان أخليهم يبطلوا تفاهات وخرافات أطفال الحضانة دي.. بس ونزلت بعد ما خلّيت مس ميادة رئيسة التمريض تقف تكتب أسامي أي حد يتكلم ف الدورع السبورة لحد أما أرجع .

= الحق يا دكتور

- فيه ايه تاني يا مس روحية !

= عبد الوهاب قال لمدبولي يلا يا أبو مناخير كبيرة ومدبولي عمال

يعيط



www.Mktbtk.uk

كاس العالم

عمري ما هنسى أبدأ اليوم الي مصر اتأهلت فيه لكاس العالم روسيا ٢٠١٨، يوم ماتش الكونغو وضربة جزاء صلاح الي في آخر ثانية في الماتش الي سجل منها هدف وأهلنا لكاس العالم بعد سنين طويلة وعذاب.

عمري ما هنسى اليوم دا بجد ولا فرحته، وخصوصاً إني كنت نبطشي يومها وفي المستشفى وطلعت الكافيتريا بتاعت المستشفى لقيت مفيهاش حطة الواحد يعرف يحط رجله فيها، مليانة على آخرها دكاترة كبار وصغيرين وتمريض وأهالي وقرابب مرضى محجوزين في المستشفى، حتى المرضى، فيه والله ناس محجوزة كانت عاملة عمليات عظام في رجليها لقيتها قاعدة على كراسي متحركة بتابع معانا الماتش.

كان يوم اتجمع فيه كل المصريين على هدف واحد، والحمد لله ربنا جعل محمد صلاح سبب إنه يفرح كل الناس دي ويفك

النحس ونتأهل بعد أكثر من ٢٨ سنة، بس عارفين، أنا بحثت في موضوع نحس مصر وتصفيات كأس العالم اللي إحنا عمالين نموت نفسنا فيها وعليها دي، ولقيت إن الموضوع مش نحس، لأ مرقعة، ومش مرقعة عادية كدا، لأ دا إحنا عدينا براميل بحر المرقعة كمان.

يعني جدير بالذكر إننا مع بدايات كأس العالم وبالنظام القديم اللي كانت التصفيات فيه بتضم منتخبات قارات مختلفة مش أفريقية بس، إحنا اعتذرنا كتبيبيير أوي عن المشاركة في التصفيات المؤهلة لكأس العالم لأسباب مختلفة ومتنوعة، وجدير بالذكر أكثر إن كأس العالم ١٩٥٠ في البرازيل، مصر اعتذرت عن التصفيات لسبب عجيب جداً، اعتذرت خوفاً من عناء السفر إلى أمريكا الجنوبية!.. آه والله.. يعني بالعربي كدا مصر رفضت تشارك في التصفيات عشان قالت «فاكس كدا كدا لو اتأهلت مش هروح.. البرازيل بعيدة يا عم».

وجدير بالذكر أكثر وأكثر وأكثر، إن بردو في كأس العالم ١٩٣٨ في فرنسا، مصر رفضت تشارك في التصفيات النهائية، ليه بقى؟ لأن مواعيد الماتشات بتاعت التصفيات ماكتتش ملائها!

وكأس العالم في تشيلي ١٩٦٢.. التصفيات بتاعتنا كانت عبارة عن ماتش واحد بس، ماتش مع السودان، اللي هيكسبه هيتأهل لكأس العالم علطول في تشيلي، يقوم إيه بقى.. يقوم المنتخبين

الأثنين يعتذروا عن الماتش عشان ميعاد الرياح الموسمية.. آه والله العظيم.. عشان الرياح الموسمية! (: (:

- اسمعوا بقى الثقيلة.. كاس العالم في أورو جواي ١٩٣٠.. الفيفا قالت لمصر تعالي شاركي في كاس العالم من غير تصفيات يا مصر.. بلوشي كدا يعني.. والحمد لله مصر ماكنش وراها حاجة وقتها والمواعيد كانت مناسبها والشمس ماكنش مغيمة ولا الرياح كانت موسمية ولا كان فيه موسم صيد فراشات ولا أي حاجة مهمة.. فمصر وافقت أخيراً أنها تروح كاس العالم... بس مروحناش بردو.. عارفين ليه؟.. منتخب مصر اتأخر على الباخرة اللي بتنقل المنتخبات لأورو جواي فالباخرة مشيت وسابتهم (: (: :
(: (: متخيلين!

تاريخ طويل حافل بالمرقعة ♥♥♥

مش موضوع نجس لأ



www.Mktbtk.uk

و
ب
ك



www.Mktbtk.uk

The Minions

في بداية شهر مارس، جه الميعاد السنوي الي بيستلم فيه دكاترة الامتياز الجداد من كل جامعات مصر شغلهم في المستشفيات، ويبدأو رحلتهم لأول مرة بالاحتكاك مع الواقع الطبي الجميل بتاعنا، وأول ما استلموا في المستشفى عندنا كنت علطول من أول الناس الي قعدت معاهم أنصحهم شوية نصايح كدا مهمة جداً لازم يخلوا بالهم منها، طبعاً دا مش عشان خاطر مصلحتهم ومستقبلهم، أنا بس الي بحب أنصح الصراحة، أجواء النصح دي عارفينها، بحب الدور بتاع الفنان رشوان توفيق دا أوي .. المهم:

= أول نصيحة..انسوا دكاترة الامتياز الي شوفتوهم في لحظات حرجة..انسوا خالص دكاترة الامتياز بتوع جرايز أنا تومي بردو.. اتفرجوا بقى على كرتون الـminions .. هو دا فترة الامتياز في مصر.

= ثاني نصيحة وأهم نصيحة.. بلاش تلبسوا بالطو أبيض.. ملوش لازمة جو «جايلكويا شوية مجدي يعاقب» دا.. أنا عارف

إنكو بتبقو فرحانين بيه في الأول.. بس بلاش ثم بلاش ثم بلاش.. لأن وقت أي خناقة.. اللي لابس بالطو أبيض هو اللي بيتضرب.. بجد مش بهزر.. حتى لو المشكلة ملهاش علاقة بالدكاترة أصلاً.. بس هو كدا.. اللي لابس بالطو أبيض يتضرب الأول وبعد كدا نشوف إيه المشكلة.. فحافظاً على سلامتك كطييب امتياز بلاش بالطو.. عندك حاجة عملية جداً ومريحة اسمها اسكرابات.. البسها.. وخصوصاً الكحلي.. يعني بلاش تلبسلي أخضر وأزرق ولبني.. بلاش الألوان دي.. الكحلي أشيك وأجمل ونفس لون اليونيفورم بتاع شركة «كوين سيرفس للنظافة» اللي ماسكة أغلب المستشفيات.. عشان وقت الخناقة تعمل نفسك بتنصف العنكبوت مالسقف واسأل على المقشة وأطلع اجري.. متستنهاش.. لأن مفيش مقشات فالمستشفى.

= تالت نصيحة.. هتلاقي كل الدفعة في نفس الوقت بتفكر تسافر ألمانيا بعد الامتياز.. وعمالة بتذاكر ألماني وكل جروب يجمع نفسه ويروح يتفق مع مدرس ألماني عشان يشرحلهم ويمتازوا امتحان اللغة ويسافروا.. بيبقى موسم غسل لمدرسين الألماني بصراحة.. أحجزوا معاهم مفيش مشكلة.. مش هنقطع عيش حد.. بس خليك عارف إن ألمانيا مابتلمش.. ماشى.. مش اتجاه المرج هو.

= النصيحة الرابعة والأخيرة ودي مهمة جداً.. حافظ على نفسك وصحتك وأنت بتشتغل.. لأن لو مت ولا جرالك حاجة.. إنتو عارفين الحاجة الوحيدة اللي هتعملها وزارة الصحة.. هيروحو

مشطيين عليك فالدفتر فالإنصراف.. فتخلي بالك على نفسك ... لأن مثلاً وأنت لسة بتتعلم سهل أوي تشك نفسك.. ومش هنسى أبداً واحداً صاحبي وهو بيخيط مريض كبير فالسن راح شاكك نفسه.. فسأل المريض قاله عندك أمراض؟.. قاله: آه.. عندي فيرس سى.. فصاحبي دا اتصدم طبعاً وكمل الخياطة وهو مصدوم فشك نفسه تاني عشان مكنش مركز.. وأكثب طول اليوم وفضل يتخيل الفيرس وهو راكب مكنة صيني وعمال يخمس فدمه.. وراح يعمل تحليل يوميهما بعد ما خلصنا عشان يعرف فيرس سي جاله ولا لأ.. قالوله لازم تستنى كام شهر وبعد كدا تعمل التحليل.. لأن لو عملت دلوقتي مش هيطهر حاجة.. فطبعاً كان مضطر يستنى على أعصابه حوالي ست شهور عشان يعمل التحليل ويتظمن.. ودا خللاه يحلف إنه مش هيبخيط حالات تاني ولا يقف في استقبال الجراحة تاني.. وعشان هو كان موسوس جداً مقدرش ينسى الشبكة طول الست شهور وجاتله حالة شديدة من الإحباط ومبقاش يسرح شعره.. وبعد كام شهر عمل تحليل الفيرس.. فلقاه سلبي الحمد لله.. فرجعله التفاؤل تاني وقرر يرجع استقبال الجراحة ويخيط بس وهو واخذ باله المرادي.. فراح شاكك نفسه تاني بردو.. واضطر يستنى ست شهور تاني عشان يحلل ويتظمن... كنت خلصت أنا فيهم امتياز بقى وهو خلص تسع ألبومات حزينه لمصطفى كامل.

وفي النهاية أحب أوجه رسالة بقى للمرضى وقرايهم اللي بيجو المستشفى.. هتلاقوا دكتور فرحان جداً وهو بيعمل حاجات تافهة

www.Mktbtk.uk

بالنسبالك.. يعني فرحان وهو بيدي حقنة.. وهو بيركب كانيولا..
وهو بيقطع البلاستر ويلزقه.. دا بيبقى دكتور امتياز جديد..
تطببوا عليه وتبوسوه ومحدث يزعله من فضلکم ♥



www.Mktbtk.uk

المخترعين

بسم الله الرحمن الرحيم.. هكيلكو حاجتين شوفتهم في التلفزيون أثروا في قرار غير مهم جداً خدته في حياتي:

(١)

شوفت جزء من حلقة برنامج عجيب كدا في قناة المحور المذيعه مستضيفه أثنين في تالته إعدادي وواحد عنده خمس سنين ..هى بتقول إن دول عبقارة بقا في مجال التكنولوجيا ومخترعين روبات ... المهم الروبوت كان شكله غريب أوي ومعمول بالمكعبات وحالته صعبة ... ولما بدأ ويشغله قعد يلف حولين نفسه بطريقة هبله جداً... فالواد المخترع قالها هو المفروض بيشتغل عادى بس إضاءة البرنامج مزيقاه وإحنا معانا فيديو مصورينه وهو بيشتغل كويس! المهم بغض النظر عن كل دا.. في الآخر سألتهم قالتهم: (طيب جميل أنتوا اخترعتوا الروبوت دا.. بس اخترعتوه ليه بقا؟ يعني إيه التطبيقات العملية اللي ممكن نستخدمه فيها في الحياة؟).

شوفت برودو برنامج على صدى البلد المذيعه مستضيفه أم وابنها عنده بتاع ٣ سنين والبانع الشاشة مكتوب تحت الطفل اللي لسه مفقشش من البيضة دا «المخترع / مش عارف محمد مين كدا!!» .. لا والمذيعه بتسأل الأم بتقولها اكتشفتي منين إن محمد ابنك عبقرى؟ .. قائلها: لاحظت الموضوع دا عشان كل شوية ألقيه مبلعبش باللعب اللي بجبهاله وبيكسرها وبيفككها فشكيت إنه بيحاول يخترع.. روحت بيه لدكتور ذكاء (معرفش إيه دكتور الذكاء دا بس هي بتقول إنها راحتله) فعمله اختبار ذكاء وقالها ابنك يا مدام ذكى جداً وكلها ٤ سنين بالظبط وهيقي عنده القدرة إنه يدي محاضرات في أكبر جامعات العالم.

المذيعه قائلها طب هو اخترع حاجة؟ .. فالأم قائلها كتييسير .. المذيعه قائلها زي إيه .. قائلها محمد ماشاء الله اخترع عربية بتطير .. بس هي ف البيت نسيت أجيبها .. فالمذيعه قائلها ما شاء الله إزاي .. قائلها جاب عربية لعبة وقالي أنا عاوز طيارة هيلكوبتر يا ماما .. جبتله طيارة هيلكوبتر .. فلقيته من نفسه من غير ما حد يقوله راح مكسر المروحة بتاعتها ومركبها ف العربية وبقت بتطير!

فالمذيعه قائلها ما شاء الله وإيه كمان ... ف قعدت بقى الأم تحكيلها عن اختراعات بنت **** ملهاش أي ستين لازمة زي كوباية بـ غطا .. وبتاعة مدورة كدا بتقول إنها بتعلق على الباب وبتعمل صوت لما الباب يفتح .. وحاجات عجيبه جداااا.

المهم أحسن حاجة بقى إن في آخر الفقرة بردو المذيعه بتسأل
الأم بكل جدية بتقولها: «فيه مشاكل بتقابلك ف التعامل مع طفل
بالعبقرية دي؟».. قامت الأم قالتها: «آه.. المشكلة بس بخاف اسيبه
لو حده بالمفكات وأدوات الإختراع عشان بيحطها ف بؤه.. فلازم
أبقى جنبه».

هو عبقرى جدا بس بيحط الاختراعات ف بؤه

كفاية يا مصر أبوس شعر مناخيرك كفاية

دا بوظ الطيارة اللي بتطير عشان يخترع عربية بتطير! هاهah

اسود

المهم الحلقتين الي أنا شوفتهم دول للمخترعين ف التلفزيون
وغيرهم كتير من البلاوي السوده للمخترعين المصريين الي
بنشوفهم كلنا كل يوم على الفيسبوك، ادوني شعور بالانسكيورتى
تجاه قدرة أطفالنا وأولادنا إنهم يعملوا حاجة تفيد العالم.

عشان كدا في يوم وأنا قاعد فالاستقبال منهك القوى بعد
نبطشية ٤٨ ساعة ومش قادر بقى لدرجة إن كان على مناخيرى
شوية جبس وحاسس بيهم ومريض قالى عليهم وبالرغم من
كدا مكسل امسحهم.. أصل همسحهم ليه مهو كدا كدا مناخيري
هتوسخ تاني.. المهم في خضام كل دا دخل عليا التواد ابن مس

بدرية ممرضة الاستقبال .. عيل كدا عنده بتاع ٦ سنين بس يمتلك كتلة مكانية وزمانية بتاعت طفل عنده ١٠ سنين.. أو بمعنى أصح بالبلدي كدا عيل اللهم صلى ع النبي مليون.

المهم لقيته داخل عليا وهو عارفني وواحد عليا من كتر منا مرمي ف الاستقبال ومن كتر ما مس بدرية بتجيبه معاها في الشغل .. المهم لقيته فاكك جهاز الضغط بتاع المستشفى حته حته .. المنفاخ لوحده والوصلة لوحدها والحامل بتاعه لوحده والزئبق لوحده.. حاجة كدا معرفش عملها إزاي.. وجايلي بيه بمتتهى الانشكاح وبيقولي: «بص.. بص عملت إيه».. وهو مبسوط جداً!

أنا طبعا احترت أرد عليه أقوله إيه.. اشتمه وأهزقه عشان بوظ الجهاز؟.. ولا أشجعه يمكن فيه بذرة مخترع ولما يكبر ويبقى عالم كبير ويطور جهاز الضغط يبقى يفتكرني إني أول واحد شجعته وخذت بأيده؟.. بس لا.. دا مش منظر عالم دا شكله عيل أهطل ... بس لا بردو ... ما كل العلماء والمخترعين بيبقى شكلهم أهطل في بدايتهم.. وعادي أينشتاين مكنش منظره عالم ... حاجة تحير والله طب ما هو أنا لو شجعته ممكن بردو يكمل ف الموضوع دا وألاقيه طالع في التلفزيون زيه زي العيال اللي بترفع الضغط الي أنا حكيتلكو عنهم في الأول ويقرفنا ويعرنا ويجبلنا الحصة.. ولا أشتمه وخلاص.. وأنا والله عايز اشتمه أصلا كدا كدا من غير حاجة.. ولا أشجعه؟



www.Mktbtk.uk

عشان كدا ريحت دماغى ولا شجعته ولا شتمته.. قولته: «زي
الفل روح وريها لأمك».. وهما دقيقتين بالظبط مسافة ما رحلها
وسمعت صوت لطشة قلم على وش طفل تخين ♥

♥#الحمد لله

♥ # كدا مش هيبخترع حاجة تاني ♥



www.Mktbtk.uk

عزمى وأشجان

دا يا جماعة واحد من أكثر المواقف المحرجة الغريبة الي اتعرضتلها في المستشفى، في يوم طلعت أمر على الحالات المحجوزة في الدور الرابع، المهم مریت على الحالات و ضبطت الدنيا وروحت عند الأسانسير ضغطت على الزرار عشان أنزل، ف الأسانسير كان نازل من الخامس ففتحلي، لقيت رئيس القسم بتاعنا راكب، فقولتله إزيك يا دكتور أسامة وركبت عشان أنزل، وطبعا الأسانسير واسع جدا فكان معانا ناس تانية كثير، سواء مرضى أو ناس جاية تزور مرضى.

المهم الفترة دي كانت أيام بوستات عزمي وأشجان الكثيرة الي كنت بعملها في صفحتي على الفيسبوك، المهم لابس بقى بالبطون فوق الأسكراب وشكلي دكتور جدا بقا، وواقف واقفة كلها شموخ، الي هو تحس إن أنا مدير الأسانسير، طبعا ما أنا جنبي رئيس القسم بتاعنا محدش قدي، وفجأة اللا قبلك الدكتور أسامة

رئيس القسم يقول في نص الأسانسير بصوت عالي وبمتهى
الجدية: (أنت مش ناوي تبعد يابنى عن الرقاصة بتاعتك دي بقا
وتريحنا!!)

الدكتور أسامة طبعا قصده على فيفي عبده والبوستات اللي
بكتبها، بس محدش أكيد ف الأسانسير فاهم، عشان كدا الناس
الي ف الأسانسير كلها لقيتهم بيصولي باستغراب واشمزاز كدا،
الي هو دكتور ومصاحب رقاصة!!! أسفوخس على دي دكاترة!
... وخلاص بقا بقيت بالنسبالم ياسر جلال في مسلسل لحظات
حرجة، أو ف أي مسلسل عامة مش فارقة هو مريب ف كل حالاته.
ولسة بفكر بقى في طريقة أوضح للناس فيها إن الدكتور
أسامة قصده على مسلسل أشجان وعزمي.. لقيته بيكمل ويقول
:(وبعدين مالك بجوزها دا كمان.. دا شكله راجل طيب.. سيبه ف
حاله).. هو قال الجملة دي وراح خارج من الأسانسير ف الدور
التاني وسابني أنزل للأرضي لوحدى مع الناس وهي عماله تبصلي
بإيموشن «الكلاب اللي بتضيق عينها»

طب الرقاصة وماشي ... إنما جوزها كمان!

طبعا أنا لو حافظلكوإنه يقصد بجوزها دا كمال أبورية مش

هتصدقوني



أجمل إحساس في الكون

في نبطشية من نبطشيات رمضان وقبل الفطار بكام ساعة سابني
السينيور بتاعي أحمد كمال وقالي أنا طالع اتفرج على كونج فوباندا
الجزء التالت في السكن على اللاب، لو احتاجت أي حاجة كلمني.

المشكلة إنه سينيور طويل كدا وله هيبة وميانش عليه خالص
موضوع الكونج فوباندا، بس قولتله ماشي اطلع أنت ولو ميكي
ماوس سأل عليك هبقي أقولك حاضر.. أطلع يا حبيبي.. أطلع.

المهم طلع هو من هنا وشوية لقيت أم وابنها داخلين عليا
الاستقبال.. خير يا ست الكل.. قالتلي الواد وقع على دراعه وهو
يلعب كورة... كشفت ع الواد وطلبتله أشعة.. راح عمل أشعة
ورجع.. بصيت ف الأشعة لقيت فيها كسر.. فقولتله فيها كسر
وهنجبسه وهيبقي كويس إن شاء الله.. بس هو يحافظ على نفسه
بس وميلعبش كورة تاني لحد ما يخف واحتياطي بردو ميتفرجش
خالص على أي مسلسلات لـ حسن الرداد.

المهم لفيت قطن حولين دراع الواد وأخذت أول رباط جبس من

الدولاب وبليته ف المية وبدأت ألف على إيده بقى.. يدوب لفيت كام لفة ولسة مكملتش الرباط لقيت واحدة ست وراجل داخلين عليا أوضة العظام وكلهم فرحة بغباء.. فقولتلهم خير؟.. ف الست قائلتي بكل انشكاح: هنية طلعت ريح يا دكتور... طلعت ريسيسيسح ..

أنا اذهليت من الموقف منطقتش.. معرفتش أرد أقول إيه الحقيقة!.. فلقيت الست بتقولي بفرحة أكبر: (آه والله يا دكتور.. دى طلعت ريحين ورا بعض كمان مش ريح واحد بس) <<< والله ما مشكلتي ف العدد يا ست!.. أنا مشكلتي ف الريح نفسه!... أنا مال أمي بيه!!!

طبعاً أنا كان نفسي والله أشاركهم فرحتهم دي وأرمي رباط الجبس اللي ف إيدي وأروح أحضن الراجل اللي مع الست وياااااااااه ياما أنت كريم يا رب.. والحمد لله.. وربنا عوضنا آخرة صبرنا خير وكل الحاجات دي.. بس أنا فعلياً معرفش مين هنية دي أصلاً؟.. عشان كدا سألتهم قولتلهم هنية مين؟

ف قالولي هنية اللي عاملة الزايدة ف الدور الخامس يا دكتور.. فقولتلهم آآه.. لا دا استقبال العظام حضرتكم.. استقبال الجراحة العامة هناك أهو الأوضة اللي بعد الجاية .

بس.. واديتلهم رقم مدير المستشفى يتصلو بيه بردو يفرحوه.. غلبان

وبعدين طلعت السكن لأحمد كمال عشان أقوله الخبر أفرحه

لقيته قاعد حاطط إيده على خده وهو محتار ما بين النمر والبجعة أنهو فيهم الباندا



اللي جاي حمادة "حرفياً"

قد يأتيك البلاء على هيئة نايب جينيور يرفعلك الضغط .. آه والله.. في فترة استلم عندنا فالمستشفى مجموعة من النواب الجداد في قسم العظام، من ضمنهم بقى نايب جينيور معين كدا هو أكيد هيعرف نفسه لما يقرا، محسني إنه مش جاي يستلم شغل في تخصص متعب، لا دا جاي يقضي وقت لطيف ف المستشفى مش أكثر.

يعني وهو قاعد في النبطشية كل شوية يقوم مصور نفسه ورافع الصورة عاليس وعلى جروب القسم، مرة تانية فالنبطشية بردو تلاقيه قاعد يتجول في طرقة المستشفى بطريقة عجيبة كدا كأنه مثلاً ماشي في فيديو كليب مش ف مستشفى خالص! وحجات تانية كثير، النايب دا اسمه حمدى سعد بس أنا همسميه حمادة سعد ف الفصل دا، أولاً عشان منفضحهوش، وثانياً عشان هو لايق عليه اسم حمادة أكثر.



المهم وأنا قاعد ف العيادة الأسبوع اللي فات سمعت صوت
شئ بيطرق عالأرض بمتهى الثقة داخل عليا، ببص لقيت
جزمة متورنشة ماشية عالأرض، ببص فوق الجزمة لقيت بنطلون
أبيض مكوي، ببص فوق البنطلون لقيت قميص وجرفته وفوقهم
جاكت جلد بيلمع، ببص فوقهم لقيت دماغ حمادة سعد!

قولتله إيه يا حمادة اللي أنت لابسه دا يا حبيبي.. أنت جاي
تستلم جايزة أحسن نايب!! أقلع يا حبيبي الحاجات دي عشان
هنجيب حالات يا بابا.. يلا يا حبيبي ربنا يهديك متفقعنيش.

المهم قلع الجاكت ولبس بالطو وقعد زيه زي أي مطرب مشهور
قاعد في السويت الخاص بتاعه في الفندق.. وفي أثناء الكشف كدا
اتزحمت الأوضة فجأة وبقت مليانة مرضى.. ودا لأن مكنش فيه
أمن على الباب يومها ينظم الناس.. ف أول ما الدكتور حمادة لقي
الدينا زحمة حواليه.. قام واقف ولقيته بكل حدة وكيوتنس في نفس
الوقت بيقولهم: (لو سمحتوا احترموا خصوصية المرضى).

محدث عبره طبعاً وفضلوا واقفين عادي ولا بصوله أساساً..
قالهم تاني: (لو سمحتوا احترموا خصوصية المرضى).. محدش عبره
بردو.. قمت أنا بقى متخن صوتي ومصرخ فيهم بقا: (احترموا
خصوصية المرضى يعني أطلعوا!!!!!!!!!!!!!!!!!!!!!! برا!!!!!!!!!!!!!!... فيه حالة
بتكش!!!!!!!!!!!!!!!!!!!!!! اف!)... محدش عبرني!

بالعكس فيه واحدة كانت ماسكة تذكرة كدا زغرتلي وقاتلتي

مكتبتك

مكتبتك لعمل الكتب اندرويد ورفعها على جوجل بلاي

كتب معرض الكتاب على موبايلك اثناء المعرض

يمكنك طلب اي كتاب على جوجل كتب فقط بربع الثمن

ان اردت رفع كتاب لك يمكن ان ترسل لنا على صفحتنا
على فيس بوك (مكتبتك) او (Mktbtk.uk)

يوجد ايضاً افلام ومسلسلات بدون اعلانات على موقعنا

www.Mktbtk.uk

www.Mktbtk.uk

و
ب
ك



www.Mktbtk.uk

The shape of water

واحد زميلي ف النبطشية اسمه يوسف عاشق للأفلام الأجنبي، كل ما النبطشية تهدي ليل الاقيه راح مشغل الأياد بتاعه وفتح فيلم أجنبي كدا ويقعد يتفرج عليه، المهم مرة لقيته بادىء فيلم جديد.

سألته فيلم إيه؟.. قالي دا فيلم the shape of water .. ودا كان عامل ضجة كبيرة لأنه وقتها المفروض كان واخذ أوسكار أحسن فيلم وأوسكار أحسن إخراج، عشان كدا علطول قولت لازم أشوفه معاه، لأنى كنت ناوي أنزله من عالنت وأشوفه ف أقرب فرصة، بس بجد يا ريتنى ما شوفته.. آه والله.

من جهة الإخراج أنا مش هتكلم، هو المخرج رائع طبعاً ومن جهة المؤثرات الصوتية والساوند تراكم بتاعت الفيلم فهي الأفضل في أفلام السنة، فيستاهل بصراحة جايزة أحسن إخراج، بس من جهة إنه أحسن فيلم.. فدا اللي هو أم الاستهبال بقى!!..

The shape of water

واحد زميلي ف النبطشية اسمه يوسف عاشق للأفلام الأجنبي، كل ما النبطشية تهدي ليل الاقيه راح مشغل الأياد بتاعه وفتح فيلم أجنبي كدا ويقعد يتفرج عليه، المهم مرة لقيته بادىء فيلم جديد.

سألته فيلم إيه؟.. قالي دا فيلم the shape of water .. ودا كان عامل ضجة كبيرة لأنه وقتها المفروض كان واخذ أوسكار أحسن فيلم وأوسكار أحسن إخراج، عشان كدا علطول قولت لازم أشوفه معاه، لأنى كنت ناوي أنزله من عالنت وأشوفه ف أقرب فرصة، بس بجد يا ريتنى ما شوفته.. آه والله.

من جهة الإخراج أنا مش هتكلم، هو المخرج رائع طبعاً ومن جهة المؤثرات الصوتية والساوند تراكم بتاعت الفيلم فهي الأفضل في أفلام السنة، فيستاهل بصراحة جايزة أحسن إخراج، بس من جهة إنه أحسن فيلم.. فدا اللي هو أم الاستهبال بقى!!..

من وجهة نظري قصة الفيلم من أنفه وأعبط ما يكون، قصة مملّة،
الأطار بتاعها اتهرس كثير قبل كدا والأحداث تقليدية مفيهاش أي
جديد.

قصة الفيلم بتدور حولين واحدة ست بتحب سمكة، أو ذكر
سمكة بمعنى أدق، ومش بتحبها اللي هو «الله إيه السمكة الحلوة
دي لما أحطلها أكل».. لا بتحبها حب من بتاع عمر وسلمى دا،
ومش بس كدا، دول بيقيموا مع بعض استغفر الله العظيم علاقات
سمكية كاملة.. حاجة منتهى قلة السفالة والإنحطاط.

وياريت مثلاً فيه مبرر للحب دا ... يعني السمكة أنقذت
حياتها.. أو بتعاملها حلو وطيبة زي فيلم الجميلة والوحش كدا
فالبت مع الوقت تحبها... لا ... دا البت أول ما شافت السمكة
حبتها من أول نظرة!!! يعني دا منطقي دا!!! كدا علطول من غير
مبرر!!!

بجد أنا طول الفيلم كان الأستاذ مصطفى شعبان عمال يجي
ف بالي.. حد هيسألني ويقول طب والأستاذ مصطفى شعبان إيه
علاقته بالفيلم.. هقوله ملهوش علاقة.. بس أنا كده.. لما بتفقع
من حاجة، علطول بيجي ف بالي هو أول واحد.

وكله كوم والشيرير بتاع الفيلم كوم تاني.. عامل زي الأشرار
بتوع السينما المصرية زمان.. اللي هما مكشرين علطول وأشرار في
المطلق كدا.. طول الوقت بيتكلموا كلام شيرير... ويبصوا بصوات

www.Mktbtk.uk

شريرة... ويهزرو هزار شرير.. ويتبرزوا براز شرير... الي هو
بيبوظ السيفون دا.

يعني الي مستني من الفيلم.. قصة رومانسية.. من وجهة نظري
مش هتلاقي أي قصة أصلاً.. والشخصيات ماكسبتش تعاطفي
طول الفيلم.. حتى في آخر الفيلم لما السمكة خدلتهما طلقتين في
صدرها.. من كتر ملل الفيلم متأثرتش خالص.. كان كل تفكيرى
في حاجات تافهة تانية زي «ما السمكة اتحبت أهية.. آمال إيه بقى
ليه الفنان محمد كريم محدش بيحبه؟».. وحاجات من دي كدا..

MAKTABTK

مكتبتك



Mktbtk.uk

www.Mktbtk.uk

و
ب
ك



www.Mktbtk.uk

أوبن بوفيه

عيادة العظام عندنا فالمستشفى من أكثر العيادات الجميلة المزدهمة دائما بالركاب، تلاقي واقفلك على باب العيادة الصبح كدا يحيي عشروميت واحد، منهم أربعة أو خمسة بالكثير مرضى بجد والباقي بقى جاي مخصوص قاطع تذكرة بجنيه عشان ياخذ مرهم مسكن!.. مش فاهم إيه سر حب المصريين فالمراهم! لا وفيه ناس بتيجي قاطعة تذكرتين وتلاتة وعاوزاني اكتبلها مرهم أو أتنين على كل تذكرة.. اللي هو لو سمحت يا دكتور اتفضل امضيلنا على صفقة المراهم دي عشان نصرها!

المشكلة الفعلية بقى إنهم وهما مستنيين دورهم بيعملوا مشاكل وخرافات كتير، ودي طبيعة سكان المنطقة اللي حوالين المستشفى، معندهم مش مبدأ الطابور ودورك والكلام الفارغ دا... لأ... دول ماشيين بمبدأ البقاء للي «علوضعه» عشان كدا وأنا قاعد جوه فالعيادة يبقى سامع شلايتهم وكيعانهم فوش بعض وف

مناطقهم المعينة، دا غير الشتايم والخناقات، ومرة فكرت أقول للممرض الي معايا فالعيادة إنه يطلع ينظمهم بره، من ساعتها مارجعش، تقريبا قتلوه.. بس ملناش دعوة.

المهم في أحد الأيام بعيادة العظام بالمستشفى ووسط الزحمة الرهيبة من الحالات، دخلت ست - خمسة أمواه ف عين العدو- طول بعرض بارترفاع، كانت شبه الأستاذة سميحة قلوب جدا، شكلاً وجبروتاً، حاجة كدا أول ما تشوفها تديك إحساس إنك أنت الي عيان مش هي.

المهم دخلت وهي ماسكة عدد كبير من التذاكر ف أيديها، وقامت مدياني تذكرة وقالتلي رجلي بتوجعني وعايزة مرهم ومسكن ومضاد حيوي، أنا قولتلها ثانية واحد دي تذكرة رمد!! قالتي لا مؤاخذه يا أستاذ وقامت مدياني كل التذاكر الي معاها وقالتلي طلع العظام.

قعدت أفر فالتذاكر.. لقيت بقا تذكرة جلدية.. وأتئين باطنة.. وواحدة أنف وأذن.. وتلاتة نسا.. وبلاوي سودا!! أنا قولت دي أكيد الأدمن بتاع جروب «كل يوم رحلة جديدة» وجاية الجروب كله وجايين يكشفوا.. المهم شوفتها وماقتنعش بشكوتها بس كتبتها العلاج وخلص عشان كنت نبطشي قبلها ومفيش حيل للمناهدة. نص ساعة ولقيتها دخلاي تاني وهي منفعله وبتقولي مفيش مرهم مسكن تحت فالصيدلية أنتو بتودوه فين!!.. ورجعتلي

التذكرة وقالتلي اكتبلي على أي مرهم تالانى.. فقولتلها حاااااااضر
هكتبتلك على مرهم للكدمات.. قالتلي خلصان بردو أنا سألت..
قولتلها طب أعمل إيه!!!!!!

قالتلي اكتبلي على مرهم للفظريات موجود تحت، قولتلها
فظريات إيه! أنا دكتور عظام!!!! هو أنتي عاوزة تاخدي أي علاج
بالجنه بتاع التذكرة وخلص! ولسه هتخايق بقى لقيت الأخصائي
اللي بيكشف معايا ف العيادة بيضحك وبيقولي اكتبلها يا عاطف
وخلصنا.. الزحمة يا حبيبي!.. فكتبتلها مرهم للفظريات وأمرني لله.
المهم بعد عدة ساعات من الصراعات ف العيادة... خلصت
وقولت أروح أمضي بقى بدل راحة لبكرة عن النبطشية الـ ٢٤
ساعة اللي كنت شايلها اليوم اللي قبل العيادة عشان تعبت .

روحت لوكيل المستشفى، هو المفروض مسئول عن مكافحة
العدوى كمان، بس هو بقاله فترة سايب العدوى وبيكافحنا إحنا،
روحت قولتلها عاوز أمضي الراحة دي لبكرة لقيته بيقولي.. أنا عايز
توقيع رئيس القسم بنفسه عليها.. ومتكتبليش اسم القائم بالعمل
كدا عاوز توقيع.. وفيين توقيع النايب الإداري؟.. وروح لـ مسئولة
دفتر النبطشيات خليها تمضيك قدام اسمك فالدفتر انك متنازل
عن المقابل المادي للنبطشية دي وبعدين خليها توقعلك عالراحة..
وبعدين أمضيها من السكرتارية بتاعت المدير وتعالى أمضيلك أنا
بقى عليها... فقولتلها ماشي وخرجت.



طبعاً أنا مش مجنون عشان أعمل كل دا.. مهو أنا لو فيا حيل
للمشاوير دي كلها مكتتش قدمت راحة!!!...عشان كدا روجت
للسينيور بتاعي اللي إنتو عارفينه، هو اسمه أحمد كمال بس بيحب
التزوير أوي، مضالي بـ أسم كل الناس دي وخلصهالي فد ثانية.

المهم وأنا ماسك ورقة الراحة بقى ورايح أسجلها ف دفتر
الحضور والإنصراف لبكرة.. لقيت مدام سميحة أيوب ماسكة
شكارة مليانة أدوية.. مضادات حيوية على مسكنات بقا على مراهم
على لوالب.. وسمعت صوت كدا مجهول المصدر غالباً دا الصيدلي
..خدته معاها كمان في الشكارة.. وأول ما شافتنى راحت جريت
عليا مدياني تذكرة.. ببص لقيتها تذكرة طوارىء!!!.. فقولتلها وأنا
مندهش: إنتي خلصتي تذاكر العيادة وقاطعة طوارىء كمان!!!

... فقامت قيلولتي وهى بتشاور على التذكرة: اكتبلي عليها أي
حقتين! <<< يخربيسيسيسيسيتك ... إنتي إيسيسيسيه!

المهم قولتلها لا مش كاتبلك إنتي ست جشعة وعايزة تلمي ف
الأدوية وخلص وشمس محتاجاها.. قالتلي بصوت عالي وتحنين: دا
حقنا وبنأخده.. قولتلها حقك لو تعبانة.. إنما إنتي كدا بتأخدي
حق غيرك ف العلاج ونيجي على آخر الشهر منلاقيش أدوية
للناس المريضة بجد.. قالتلي بلهجة مستفزة: ما تكتب وخلص
أنت غرمان حاجة!

طبعاً استفزتنى جداً وأنا تعبان أصلاً من نبطشية إمبراح وشمس

قادر.. بس سبحان من بعثني هدية من السما.. لمحت حاجة من بعيد قاعدة كدا.. دقت النظر فيها لقيتها هو فعلا مش هزار.. فقومت ماسك التذكرة من سميحة أيوب وقولتها إنتي آخر كلام عايزة حققتين؟.. قالتلي أيوة اكتبلي أى حققتين.. قولتها وأكدت عليها مش ناوية ترجعي ف كلامك؟.. قالتلي لا أقسم بالله ما ماشية إلا لما أخذهم.

قولتها تمام.. بصي شايقة الدكتور الي هناك دا.. وروحت مشاورها على شاكر الي لمحته قاعد في الاستقبال من بعيد.. قولتها الدكتور شاكر دا إيده تتلف ف حرير يا حاجة.. ياماريح مرضي وناس سليمة ويتم أسر وهجر قرى بعلاجه والله.. روحيله بقى هيكتبلك على الحققتين.. فخطفت التذكرة مني وراحت جارية عليه.

الله يرحمك يا حاجة

دا شاكر مش هيخلي فيكي حاجة الورثة يدفنوها



www.Mktbtk.uk

و
>
CK



www.Mktbtk.uk

من الذي ثقب الاوزون؟

في يوم دخل عليا راجل مكسور ومعاها واحد صاحبه، الراجل المكسور كان ساكت مبيتكلمش مبيقولش الـ «آه» حتى بخلاف صديقه اللي كان جاي معاها تماما، كان بالـع راديو.

كان بيتكلم بسرعة ولكنة هجينة توحى بأصول ريفية أو تقدروا تقولوا إنه كان بيتكلم بنفس طريقة الكابتن رضا عبد العال بالظبط، وسبحان الله كلامه كان نفس الهري بردو.

المهم عملت أشعة لصاحبه وطلع عنده كسر في الرسغ، قعدته ع الشيزلونج ولسه بيتدي الجبس لقيت الكابتن رضا عبد العال ييقول «الأوضة هنا حر أوي أكتور إيه دا» قولتله التكيف جنبك شغله لسه مصلحينه.

قام ضاغط على زرار التكيف وقالي وهو بيضغط: (تعرف يا دكتور.. شركات التكيف دي هي اللي خرمت الأوزون).. فأنا قولتله يا سلام!! قالي: (أيوه يا دكتور.. أنا قرئت كداع النت ...

الشركات دي خرمت الأوزون عشان تعمل انجباس حراري فالدنيا تبقى حر فالناس تحتاج للتكييف).. قولتله اسمه احتباس.. فقالي أيوة منا قولت كدا.. فأنا قولتله والأوزون بقى بيتخرم إزاي؟ قالي بييجيو أجهزة معينة كدا ويشغلوها تحت الأوزون لعدد معين من الشهور فيتخرم.

طبعاً إنتو زي ما تعرفوا عني، بلقط دماغ اللي قدامي علطول، وأنا استنتجت إن دماغه مليانه مربى بالعجوة، ويعمل شير للمعجزات الفوتوشوب والخيارة اللي مكتوب عليها بسن حرف السكينة سبحان الله والحاجات الديب ويب دي كلها، عشان كدا زي منا معودكم، خدته على قد عقله خالص علشان أريح دماغي، اللي هو شركات التكييف هي اللي خرمت الأوزون.. آه يا حبیبی طبعاً.. الزمالك هو نادي القرن الحقيقي.. أكيد يا خويا.. نيد ستارك راجع ف الجزء التامن.. يا مسهل الحال يا رب.

المهم الراجل دا وأنا بجبس صاحبه طول الوقت عمال يهري وأنا ساكت ومنفض وصاحبه ساكت ومع ذلك دا شغال عادي جداً لحد ما جابلنا صداع والله، في خمس دقائق بس مدة الجبس دخلنا في موضوع البنزين وإزاي الدولة ممكن تعمل عربيات تمشي بالمية بملح، وموضوع جواز القرايب وحكالي إن جواز القرايب دا عكس ما الطب بيقول، أحلى جواز، وياريتة كان انحوز شياء بنت خالته كانت شرياه، ودخلنا في مواضع أنيل من الأوزون بمراحل.

www.Mktbtk.uk

على جلدها بس وبينهش فيها من جواتها.. المهم بعد فترة صحي
الصبح بيدخل المزرعة بتاعته لقي نص البقر واقع ع الأرض ميت..
هو كان عنده السكر يا دكتور فهاستحملش الصدمة ف داخ وجاتله
غيبوبة سكر وقع ع الأرض إيده اتكسرت.. قعد إسبوعين بس ف
الجبس.. ف ليه بقى شهر ونص!!»

**** عاجل: انتحار طبيب عظام عن طريق شنق نفسه بأريطة
الجبس.. وتقرير الطب الشرعي المبدئي يؤكد: مات مفقوعا**



www.Mktbtk.uk

في دقيقتين

ياخذ الكبد وياخذ العين

في ليل أحد نبطشيات الشتاء القارصة، كان معنا في العمليات عملية طوارئ لكسر في ساق راجل عنده بتاع ٤٠ سنة، الكسر كان وحش جداً عشان كدا فضلنا في العمليات يومياً من الساعة ١٢ ليل لحد الساعة اتنين ونص ليل، المهم أنا كنت متعقم في العملية دي أنا والأخصائي والنايب الجينيور الجديد الشهر حمادة سعد.

إحنا كنا معقمين حمادة معنا في العملية مع إنها مش محتاجة أكثر من اتنين جراحين عشان نعلمه ونخليه يدخل في أجواء عمليات العظام، بس للأسف حمادة جابلنا الضغط، قعد يسأل أثناء العملية أسئلة كتير، طبعاً انتوا فاكرينها أسئلة طبية، بس للأسف لا، كان يسأل الأخصائي أسئلة زي «حلو أوي البرفن اللي حضرتك حاطه دا يا باشا نوعه إيه؟»، «سمعتو ألبوم شيرين الجديد؟ تحفة جداً!!!!»، وأسئلة كتير من اللي تفقع دي وإحنا مركزين في العملية عشان كدا

الأخصائي قفش عليه طبعاً بعد كام سؤال من بتوعه وزعقله وقاله ركز في أم العملية إحنا مش جاين نلعب، فمكاش من حمادة سعد إلا إنه سابه من الأخصائي ومن العملية وقعد يكلم الممرضة اللي واقفة معانا... هيشلنا كلنا والله.

وعلى آخر العملية كدا الأخصائي قال لحمادة باعتباره النايب الجينيور ومبيعملش أي حاجة وملهوش لازمة في العمليات.. فـ قاله يلا يا حمادة سيب العملية أنت وروح بسرعة هاتلنا كام ساندوتش كدا نتعشى بيهم عشان أنا ميت من الجوع.. بس ف السريع قبل ما المطاعم تقفل.. ودا طبعاً بعد ما مس أماني ممرضة التعقيم اتصلت بالديلفيري وقالوها إن آخرهم للساعة اتنين ف الديلفيري.

المهم حمادة جاب ورقة عشان يكتب فيها الطلبات وسألنا عاوزين ساندوتشات إيه؟.. فالأخصائي قال أنا عايز اتنين فول و اتنين طعمية.. وأنا قولتله وأنا اتنين فول.. والممرضة اللي كانت معانا مس لبنى طلبت اتنين طعمية، ومس أماني طلبت واحد بابا غنوج وواحد طعمية.. وحمادة قال إنه هياكل ٢ بطاطس بالجبنة الرومي والمودزريلا (سبحان الله، حتى الساندوتشات اللي بياكلها تافهه بردو) وبعدين قالنا عايزين حاجة تانية؟.. قولنالاه لأ روح يلا بسرعة وهنحاسبك لما تيجي.

خمسة دقائق وكنا خلصنا العملية وحطينا المريض في أوضة الإفاقة.. ودي أوضة موجودة في العمليات بيتحط فيها المريض

تحت ملاحظة التمريض ودكتور التخدير لحد ما دكتور التخدير
يظمن عليه إنه بقى تمام ويصرح بخروجه من العمليات.

المهم قبل ما الحالة تخرج بقى من العمليات.. أنا خرجت اتصل
بحادة سعد استعجله بره العمليات عشان الشبكة في العمليات
ما كنتش كويسة، فخارج بقى من العمليات وماشي ف الطريقة
الي قدامها ولا بس الأوفر هيد على راسى والmask منزله كدا
وباللبس الأخضر بتاع العمليات شكلي مش واضح خالص إني
دكتور العظام، لقيت واحدة قريبة المريض الي كنا بنعمله العملية
ومستنية مع بقية أهله قدام العمليات بتقول لمراته وهي مش عارفة
إني دكتور العظام ولا حد واخذ باله مني:(خلي بالك الدكاترة
الي هنا مش مضمونين.. ممكن يغفلوكو في كلية ولا غدة ولا
حاجة.. بعد العملية تقربي جوزك على بطنه تشوفي فيه جروح ولا
لأ.. الكلية بتبقى ورا مش بتبان عشان كدا سهل تتسرق خليكي
ناصحة)

أيوة اقلبيه على بطنه بعد العملية بوظيها مش مهم.. المهم لولقيتي جروح أو

فتحات ورا يبقى سرقوا الكلية

لو ملقتيش يبقى سرقوا الطحال هما كدا كدا بيسرقوا نخلي بالننا يا أم

مجدى يا ختي احنا أولى بالأعضاء دي



www.Mktbtk.uk

و
ب
ك



www.Mktbtk.uk

باب العربية قفل على صوباع البنت.. ألحقني أرجوك.. اعمل أي حاجة ممكنة يا دكتور».

قولتلها اهدي إن شاء الله خير وقعدت البنت على الشيزلونج بتاع الكشف وشيلت المنديل من على صوباعها.. البنت أول ما شيلت المنديل قعدت تشد صوباعها مني وتصرخ جامد.. فأنا حاولت اهديها وأقولها ماتخافيش يا غسل ماتخافيش مش هعملك حاجة.. هشوف الواو بس.

بس وسط ما أنا عمال اهدي فيها.. البنت وهي بتعيط فجأة لقيتها عمالة تقول وسط العياط بتاعها: «فين كوكي يا مامي.. فين كوكي».

فإمتها على طول قالتلها: «متخافيش يا نودي، كوكي معايا أهو متخافيش».. وراحت فاتحة شنطتها ومطلعة منها سلحفة وحطتها على الشيزلونج بتاع الكشف.. وقالتلها: «كوكي أهوووو، كوكي بيحبك ويقولك خلي الدكتور يشوف صابعك».. وبعدين مسكت السلحفة وحركتها على الشيزلونج وعملت صوت مصطنع كدا كأن السلحفة هي اللي بتتكلم وقالت: «كيبب كالم بليز نودي... بليز ززز».

البنت طبعاً هدبت شوية وقعدت تططب ع السلحفة اللي محطوطة ع الشيزلونج وأنا انتهزت الفرصة دي وشوفت صوباع البنت ولقيته أزرق بسيط كدا وفيه جرح صغيرة بيحس دم.. حاجة بسيطة الحمد لله خالص... فظمنت مامتها وقولتلها هنعمل أشعة نظمن بس الأول تعالي لما نظهر الجرح دا.. وخذتهم أوضة الجراحة اللي جنبنا وغسلت صوباعها بمحلول ملح وبيتادين وحطت عليه

شاش وبلاستر وبعدين كتبتلها على أشعة تعملها.. فالمدام قالتلي أنا مش عارفة مكان الأشعة يا دكتور أنا أول مرة أدخل المستشفى دي ... بليز ممكن ما تسييناش.

طبعاً أنا أول مرة يتقالي فحياتي بليز.. عشان كدا روحت معاهم وماسبتهمش لحظة ... روحت وريتها المكان اللي هتعمل فيه الأشعة وقعدت خمس دقائق لخدم الأشعة اتعملت واتطبعت وشوفتها.. والحمد لله مطلعش فيه كسر في صوباعها.. قولتلها زي الفل جت سليمة الحمد لله يا مدام، تعالي نروح أوضة العظام بقى لما اكتبلك العلاج اللي هتمشي عليه.. وروحنا الأوضة وكتبتلها العلاج ولسة هتمشي.. البنت الصغيرة قالت مخضوضة فجأة: «مامي ... فين كوكي يا مامي!».

السؤال دا نزل على الست كالصاعقة .. آه صح فين كوكي! .. وجريت ع الشيزلونج اللي نسيت كوكي عليه وإحنا بنكشف ودورت مالقتش حاجة ... بصت تحته مالقتش ... بصت جنبه مالقتش! ... دكتور هي ال turtle فين؟ ... وقعدت تدور في باقي الأوضة والبنت بتعيط وتقول كوكي كوكي.. فأنا حسيت بأهمية كوكي بالنسباهم وكارثية الموضوع واستتجت إنها بتتباع بالواحدة مش بالكيلو أو بال «شوية» زي ما أنا كنت فاكر.. اللي هو الثلاثة بخمسين والسبعة بمية كدا يعني.. عشان كدا قمت أدور معاهم ف الأوضة .. بس للأسف مفيش فايدة خالص.. تحت المكتب وفوق المكتب.. في كل حته مفيش ... قولتلها ما يمكن جريت بره المستشفى، قالتلي جريت!! وبصتلي من فوق لتحت كدا.. المهم قلبنا الأوضة مفيش فايدة.

إنجاز علمي رهيب

= فريق عمل مايكروسوفت: قمنا بإغلاق ثغرة خطيرة جداً بويندوز ١٠.

= فريق الصحة بمنظمة اليونسكو: قمنا بإمداد ١٣٠ قرية فقيرة حول العالم بمياه نقية خلال الثلاثة أيام الأخيرة.

= فريق البحث العلمي بجامعة هارفارد: اكتشفنا علاج حاسم لمرض الزهايمر.

= فريق هندسة الفضاء بوكالة ناسا: قريباً سنطلق مكوك فضاء جديد بإمكانه تجاوز حدود المجرة.

= مس منال مديرة فريق الجودة في المستشفى النهاردة: إحنا عملنا تسطيحة جديدة للورقة اللي بتكتبوا فيها العلاج يا دكتور.



طبعاً أنا قولتلها إيه دا ألف ألف مبروك يا مس منال.. ربنا
يوسع عليكو يا رب.. أنا رايح أمرع الحالات بقى عاوزة حاجة؟..
وماستتش ترد تقولي عاوزة ولا لأ.. مشيت وسيتها علطول.

الصراحة مبحش كلامها ولا كلام بتوع الجودة «الظاهرية»
دول.. كلامها بالنسبالي زي كلام الأستاذ معتز الدمرداش بالظبط..
مبحش اسمعه.. بيرفعلي الضغط.. ويرفع لضيوفه الضغط ويرفع
لناس عايشة في كواكب تانية خالص الضغط.

يعني مثلاً آخر حاجة سمعتهاله كان حلقة مستضيف فيها
الكابتن شادي محمد كابتن النادي الأهلي السابق.. وخلى
شادي محمد بيتكلم كلام مهم في نهاية الحلقة وقام مقاطعه فجأة
وقاله: (علفكرة يا شادي أنا عايزك تتابع حلقة بكرة مهمة أوي..
عن عمليات الإجهاض)!!.. اللي هو دا المفروض تنويه ذكي منه
عن الحلقة بتاعت بكرة.. بس جه يعمل تنويه ذكي راح مهزق
شادي محمد من غير ما يقصد.. أهو بردو مس منال زيه كدا..
بتيجي تعمل جودة بتتحرق منها ف الفرن.

مش معقول جودة الصبح كدا يا مس منال، الناس لسه مفطرتش

كتبناك العلاج ف التسطيرة الجديدة يا حسن.. ربنا يجعل فيها

الشفاء



Wonder

بعد واحدة من أيام الشغل المتعبة قررت أنا وأصحابي الي كانو معايا في النبطشية إننا ننام شوية في سكن الأطباء وبعدين نخرج لبيل نروح سينما.. المهم خرجنا وروحنا عند السينما.. وبلا فخر فضلنا ساعة إلا ربع بنختار ندخل أنهو فيلم.. وفي الآخر لعبنا ملك وكتابة على الفيلم الي هندخله.. ووقع الاختيار على فيلم wonder... ودا الحقيقة من حسن حظنا جدا!!!!!!

الفيلم بجد عبقري جدا!!!!!!.. بيوصل رسالة مهمة وإنسانية وفي نفس الوقت بطريقة مبهجة مش كئيبة.. هو بيحكى عن طفل مصاب بمرض جيني ومتلازمة مرضية منذ الولادة خلته يتولد مشوه الوجه.. خضع بسببها لـ ٢٧ عملية بس بردو كان شكله بالنسبة لزمائله الصغيرين في المدرسة غريب ومعظمهم كانوا يخافو منه.. الفيلم بقى بيتناول الموضوع دا.. وقضية التنمر بين الأطفال اتناقشت فيه بشكل مختلف وجميل.



المهم الفيلم فكرني بسنة تانية ابتدائي كان عندنا فالفصل طفل كل الفصل كان بيعامله وحش.. هو مكنش عنده الحالة الي عند بطل الفيلم.. هو كان كل مشكلته إنه استغفر الله العظيم ربنا يعافينا شعره أصفر زي الأجنب وعينه خضرا.. وكان متدلع سيكا.. فكل الفصل بقى ماكنوش بيحبوه مش عارف عشان هو كان أحلى منهم ولا إيه المبرر.. المهم كانوا دايمًا يعايروه ويقولوه «يا أجنبي».. والي كان بيزفه وهو مروح بلهجة ثورية حماسية: «يا انجليزي يا جبان...هنحدفك باللبان»... ومعرفش بردو إيه الشر فإنه يجدفه بلبان!!

وفيه واحد روش كان يقوله «يا واد يا حلو» على أساس إن كدا بيشتمه يعني .

المهم أنا بقى الواد صعب عليا جداً وقررت احتويه وأقعهه جنبي وأصاحبه وماكنتش بقوله «يا انجليزي» ولا عمري حسسته إنه أقل مني يعني عشان شعره أصفر وعينه خضرا والحاجات المقرفة الي هو فيها دي.. وكنت كمان بشرّبه مالزمية بتاعتي عادي لو عطش.. مش من بؤها طبعاً.. كنت بصبه شوية مية فالغطا الصغير بتاع الزمامية كدا.

المهم فضلنا أصحاب بقى... لحد ما دخلت مرة في الفسحة في يوم لقيته قاعد فالفصل لوحده وبيقفل السوستة بتاعت شنتتي... طبعاً الموقف دا فالابتدائي ومع خيالنا الواسع أيامها.. علطول

اتصدمت ... مهو زميلك بيقفل سوستة الشنطة بتاعتك في غيابك
معناها إنه كان بيسرقك وش .. هو أينعم الشنطة ماكنش فيها غير
شوية كتب ووزارة وقلم رصاص وأستيكة أنا واكل نصها أصلا ...
إلا أني بكل حرقه وأفورة الطفولة الشهيرة قولته : (متكلمنيش تاني
يا حرامي ومتععدش جنبي .. بتسرقني !!!) ... وقولتها وأنا متأثر
جدا ومنفعل زي نور الشريف على أبنه في مسلسل حضرة المتهم
أبي .. وهو يحلفلي إن شنطتي كانت مفتوحة وهو بيقفلها .. بس أنا
ابدأ!!!!!!

ونزلت قولت للأبلة إنه بيسرقني .. قالتي سرق منك إيه ..
مبقتش عارف أرد لآني نزلت بسرعة من غير ما أشوف هو سرق
حاجة فعلاً ولا لأ .. فلما كررت السؤال وحسيت أني مزنوق ...
قولتها: (ماقدرش أقولك يا أبلة ... مينفعش أفتن على زميلي ... الفتنه
أشد من القتل) ... الست بقت بتضرب كف على كف مـ الهبل
بتاعي ومن الواقع الي أنا فتأته .

واتخاصمنا بقى وراح قعد في مكان تاني والعيال سألتني إيه الي
حصل قولتلهم بيسرقني .. قالولي شوفت مش دا الي كنت بتقول
عليه مش انجليزي .. فأنا من غيظتي بقا قولتلهم إني اكتشفت
إمبارح إنه إسرائيلي، ولقيت نجمة إسرائيل راسمها على بطشه
بالقلم الجاف .. وكلهم انبهروا وصدقوا عادي جداً ومحدث سألني
أنا وصلت لبطنه شفتها فين ... لأننا كلنا كنا أغبية وبنصدق أي
حاجة أيامها .

وبعدھا بفترة جه يصالحني فاتصالحت معاه بقى بعد ما قولتله
«هصالحك بس بشرط ... هفتح سوستة شنطتك وأقفلها زي ما
أنت عملت فبتاعتني أه»... فقالي ماشي ورجعنا أصحاب تاني
وحكالي إن العيال بقت بتقوله «يا إسرائيلي» فقولتله سيك منهم
دول سفلة.

فأنا شايف فيلم wonder دا لازم يفرجوه للأطفال يتعلموا منه
إزاي يحترموا اختلاف بعض ... لأن الفكرة مش في مرض أو خلل
جيني أدماهي الفكرة إن المجتمع دا إما بيحاول يتجنب الأنسان
المختلف.. يعني الفيلم دا لو كنا شفناه في الابتدائي كان هيغير
مفاهيم كثيرة أوي عند الواحد أيامها أحسن مليون مرة من قصة
«سعفان الكسلان» المؤثرة بتاعت تالته ابتدائي وقتها.



كل الطرق تؤدي إلى جلطة

بينما الطيور تغرد في الغروب مودعة الشمس الذهبية التي تشق طريقها نحو الديار و غصون الأشجار تهتز بنسمات الهواء العليلة التي تسبق برودة الليل كنت أنا وقتها كالعادة مرمي في المستشفى في الطوارئ ٢٤ ساعة زى سيدة في مسلسل «نحن لا نزرع الشوك» وواقف على باب أوضة العظام عمال ادعي ربنا يعدي النبطشية على خير، عشان بجد أنا مش قادر اتحرك من نبطشية أول امبارح الصعبة.

طبعاً أنا معايا في النبطشية الدكتور حمادة سعد، ودا كان بيخليني ادعي أكثر إن ربنا يستر، لأنه أولاً لسه مايفهمش أي حاجة في العظام وميعرفش الـ distal radius من كوز الدرة، يعني لا يعتمد عليه.. مقدرش اسيبه لوحده.. ثانياً بقى.. حمادة سعد ما بيهمدش في مكانه.. يعني دلوقتي مثلاً أهو عمال يتمشى في الطريقة عمال يكلم بنات في موبايله كعادته في كل نبطشياته.

المهم بعد الدعا الي دعيتة فجأة لقيت واحد جاي من أول
طريقة المستشفى بيزق ترولى (السرير اللي بعجل اللي بيتزق داف
المستشفيات) عليه واحدة ست بقوة وعنف ولهفة تجاهي.. وأول
ما وصل عندي قالي حضرتك دكتور العظام؟.. قولتله أيوة.. قالي
مراقي وقعت من على السلم مش قادرة تحرك رجليها.. بصيت
عليها وكتبتلها أشعة وقولت لجوزها خدها اعملها أشعة في غرفة
الأشعة اللي في آخر الطريقة هناك.

ف بلهفة وعنف بردوزي ما جه طار بالترولي لغرفة الأشعة
وهو في سكتة أحدث الله أمراً سعيداً للغاية لي.. الراجل وهو بيزق
الترولي خبط من غير ما يقصد حرف الترولي في مؤخرة حمادة سعد
وهو عمال يتمشى في الطريقة يتكلم في الموبايل بمرقعة.. ساعتها
حمادة سعد قعد يزعق مع الراجل وهو موجوع وحاطط إيداه على
منطقته والراجل بيعتذرله بخجل أنا أسف يا دكتور لا مؤاخذه
ماخدتش بالي.

طبعاً أنا أول ما شوفت حمادة سعد بيتخانق جريت بسرعة من
مكاني لأنني عارف عصيبة حمادة سعد.. والحمد لله فضيت الخناق
قبل ما تكبر وحمادة سعد يطلع الهاند فري الpurple بتاعته من
جيبه ويضرب بيها الراجل ويرتكب جريمة... وبعدين جيت
حمادة سعد هديته وحطته المكعبات والعريبات والpuzzle في أوضة
الجبس عشان يلعب بيها وميخرجش للطريقة بتشاقى ثاني في الطريق
ويعور نفسه.

www.Mktbtk.uk



www.Mktbtk.uk

الدكتور أحمد هارون

بمناسبة الجلطات.. المرادي الجلطة بسبب الفنان
أحمد هارون...



www.Mktbtk.uk

الأستاذ أحمد هارون في فيلم (٩٠ دقيقة) كان طالع بدور دكتور
تجميل كبير جاي من جامعة كاليفورنيا.. المهم الفنانة زينة عملت
حادثة ووشها باظ.. راح طالبها أشعة على وشها (مفيش حاجة
في العالم اسمها كدا ومايبينش فيها أي حاجة زي ما إنتو شايفين
.. عبارة عن دايرة بيضا بتمثل عضم الجمجمة وخلاص.. يعني
محدث بيستفيد منها أي حاجة) ... المهم هو طلبها وبص عليها في
عمق مع الدكتور الثاني.. وراح مشاور بصاعه على المنطقة السودا
الي في الأشعة.. الي هي أصلاً مش ف الجسم أصلاً.. دا الهوا بتاع
الغلاف الجوي الي حولينا عادي.. وقاله بكل ثقة وحسم: (مخبيش
عليك يا دكتور نبيل.. هي محتاجة لمجموعة عمليات دقيقة).

شكرا دكتور فاتيكا ما نتحرمش منك ♥

مكتبتك



Mktbtk.uk

www.Mktbtk.uk

الحرب العالمية الرابعة

في إسبوع كدا فجأة قامت حرب كوميدية شرسة في المستشفى
عندنا ما بين قسم العظام (الي أنا واحد منه) وفريق الجودة..

أنا هحكيلكو القصة من الأول خالص.. أول ما استلمت في
المستشفى من حوالي سنة كدا... فريق الجودة عدى عليا وقالي لازم
تعمل ID... الي هو الكارنيه الي بنعلقه في رقبتنا بشريطة زرقا زي
منظمي الحفلات دا.. المهم قولتلهم حاضر.. قالولي اطلعنا المكتب
وأنت مروح وهاتلنا صورة شخصية ليك وإحنا هنعملهولك..
قولتلهم والله تبغو خدمتوني.

وظلعتلهم مكتبهم وأنا مروح واديتلهم صورة وكاتب عليها
بياناتي... قالولي تمام... هات بقى ٢٥ جنيه تمن الـ id... قمت
مطلع ٣٠ جنيه.. قالولي مش معانا فكة دلوقتي قولتلهم مش
مشكلة يعني... قالولي ييقالك خمسة يا دكتور إحنا هنكتبها
وهتاخذها وأنت بتستلمه... قولتلهم والله ما فارقة دي خمسة جنيه
يعني صباح الفل.

مكتبتك

مكتبتك لعمل الكتب اندرويد ورفعها على جوجل بلاي

كتب معرض الكتاب على موبايلك اثناء المعرض

يمكنك طلب اي كتاب على جوجل كتب فقط بربع الثمن

ان اردت رفع كتاب لك يمكن ان ترسل لنا على صفحتنا
على فيس بوك (مكتبتك) او (Mktbtk.uk)

يوجد ايضاً افلام ومسلسلات بدون اعلانات على موقعنا

www.Mktbtk.uk

ومشيت وبعد كام يوم روحت خدت الـ id.... وقبل مامشي
قالولي هات خمسة وخد عشرة يا دكتور أنت باقيلك خمسة ...
قولتلهم يا جماعة إنتو شاغلين بالكو كدا ليه ... أنا والله ما
عاوزها... بصو أنا متبرع بيها لتطوير المستشفى .. أو اقولكو... هاتو
بيها حاجة حلوة للعاملين بالمستشفى بمناسبة إني جيت... دي أقل
حاجة والله أقدر أقدمها لكو.. بحبكو سلام.

ومشيت والدنيا كانت ما بينا طول السنة دي زي السمينة على
العسل... لحد الأسبوع اللي فات... أحد أعضاء فريق الجودة
دخل لرئيس القسم بتاعنا وهو شغال في العمليات من غير مايستأذن
منه واتفكلم معاه بصورة غير لائقة... فرئيس القسم اتنرفز واتوتر
وحصل شد ما بين الأثنين... مع إن المفروض الجراح وهو شغال
محدث يحاول يكلمه في أي حاجة تانية لأنه مركز في العملية و حياة
المريض مش لعبة.

فاتضايقوا إنه اتعصب عليهم والموضوع كبير.. يقومو يعملو
إيه... راحو قالبين على قسم العظام بكل دكاترته واستقصدونا
بقى... وعملوا تسطيرة جديدة لورقة العلاج زي منا حكيتلكو
وبعدها بكام يوم عملوا اجتماع لينا لمناقشة التسطيرة الجديدة..
وكان عندنا عمليات كثيرة يومها فمخضرناش... راحو مقدمين
فينا ورقة بأننا ماسبناش العمليات وحضرننا المؤتمر العالمي للتسطيرة
الجديدة اللي هما ابتكروها.



ودا غير أنهم كمان في خضام المعركة والحرب راحو مديني أنا
ودكتور صاحبي جزا يومين ... تخيلوا عشان إيه ... عشان مش
لابسين ال-ID ... في الوقت اللي فيه دكتور من قسم تاني محضرش
النبطشية ال-٢٤ ساعة أصلاً ومجاش المستشفى ولقيته واخذ زينا
يومين جزا! ... قمة الجودة في العدل يعني بصراحة.

لأ ومدير فريق الجودة كل ما يقابل واحد من زمالي يقولهم قولو
لأحمد عاطف اللي بيتريق على التسطيرة الجديدة للعلاج عالفيسبوك
إني جايله وفدماغى.

طبعاً أنا سمعت منهم الكلام دا اللي فيه لهجة تهديد واضحة
ليا واتعصبت جداً وقتها بجد ... فمن عصبيتي روحت مطلع
ال-id بتاعي ومجمع كل الأيديهات اللي معاهم ولبستها ... عشان
أبقى فالسليم وقت ما يطب عليا.. أصل معلش يعني مش أنا اللي
اتهدد.

المهم ظبطنا حوار ال-ID لقينا حد من الجودة بيقول لو واحد
زميلنا «لابس كروكس مخرم ليه؟» ... وهددوه إنهم هيكذبوا فيه
مذكرة لو الأخرام دي متقلتش ... آه والله مش بهزر ... فأنا مش
عارف إحنا داخلين على إيه فالحرب الطاحنة دي والله!! أنا
حاسس إنهم بعد كدا هيتحكموا في لبسنا ومواعيد نومنا ونكلم
مين ومنكلمش مين و«المريض اللي بتجسه دا مش مسرح شعره
ليه يا دكتور أحمد» وحاجة منتهى التلكيك عشان يدونا جزا.

www.Mktbtk.uk

فأنا من خلال الكتاب دا بستغيث بالسيد الدكتور وزير الصحة
ورئيس الوزراء وأي حد يهه سلامة المنظومة الصحية في مصر...
فاكس للخناقة دي خالص... كدا كدا هتتحل إن شاء الله...
دلوقتي أنا عايز الخمسة جنيه بتاعتي.



www.Mktbtk.uk

نوتة حياتي يا عين

من العادات الي مش عارف كويسة ولا وحشة . إن علطول معايا نوتة صغيرة كدا دايمًا بحب أسجل وأكتب فيها الشكاوي العجيبة الي بتجيلي كـ دكتور عظام في شغلي في المستشفى ... هتستغربوا إن دي بالنسبالي هواية .. حاجة كذا زي هواية جمع الطوابع ... أنا عمري ما فهمت ممارسي الهواية دي أبدااااا ... يعني ليه بيجمعوا الطوابع ؟ ... بيعملوا بيها إيه ؟ ... بيستفادو إيه طيب! ... عمري ما لقيت جواب ... أهو أنا كدا بردو بالنسبة لجمع الشكاوي العجيبة في النوتة ... عموماً مش هرغي كثير وإنتمو مش عُرب ... دي عينة بسيطة جداً من الشكاوي والطلبات العجيبة في النوتة من المرضى على مدار سنتين في تخصص العظام :

= صوابع أيدي طويلة

= لما بزق كثير بطن رجلي بيوجعني ** واحدة ست طبعاً **

= اكتبلي مطوّلات تطولني ثلاثة سستي في شهرين عشان أعرف
أقدم حربية

= فيه وجع مش محسوس في ركبتي اليمين

= إيه أمن مكان لضرب الأطفال يا دكتور من فضلك؟ ** أم
عندها حوالي ٣٠ سنة **

= اكتبلي المرهم دا اللي طعمه زي الفول السوداني

** طعمه !!!!!!!!!!!!!!!!!!!!!!! **

= أنا حاسس إن الحتة دي فاضية مفيهاش حاجة ** بيشاور
على منطقة الرسغ الأيمن ولا يعاني من وجع أو ألم أو تنميل
كل شكوته إنه حاسس إن الحتة دي فاضية الجسم بتاعه مش
مستغلها **

= هو الكسر ممكن يسببها ترجيع يا دكتور؟ ... - أيوة ممكن
من الوجع .. = طب هي دلوقتي مرجعتش، عادي؟ ** زوج
مصطحبا أنشاه المصابة بكسر في الساعد **

= صوباع رجلي الثاني أقصر من الصوباع الكبير الأولاني

= بتعملو عمليات مظراب؟ إيه المظراب دا! مظراب
يا دكتور مش عارفه! لا مش عارفه يا دكتور مظراب
طبي! ... مظراب طبي إزاي يعني! ** بعد شرح طويل فهمت إن
قصده عملية منظار **

= دكتور أنا جعان هتخلصوا إمتي؟ ** مريض متخدر نصفي
في وسط عملية شرايح ومسامير صعبة بنعملهاله فدرجله **

= دكتور هو لو دهنت مرهم ع الجبس، الجبس هيتشربه ويوصل
لأيدي ولا أخذ أقراص وخلاص؟

= ما تعرفش دكتور عظام كويس أحسن من اللي هنا نروح
نحبس عنده؟ ** والد طفلة موجهها السؤال لي بعدما قمت
بالكشف على الطفلة وعمل أشعة لها وأخبرته إن بها كسر بسيط
ويحتاج لعمل جبس **

= ألق يا دكتور.. محسن جاتله زغطة ٣ مرات ورا بعض **
مرافق لـ مريض طالبا مني أسباب حالات الطوارئ اللي ف أيدي
واتجه بسرعة لـ نجدة محسن «الي محجوز في المستشفى لعمل عملية
تثبيت لكسر ب الإبهام الأيسر» عشان جاتله زغطة! **

= عايزة حل لأبني يا دكتور، أنا عملت أشاعات وتحاليل
كثيرة وكلها طبيعية، أبني كل ما يقع من ع السلم أو من مكان
عالي بيتكسر أو بيتعور ** أم مصرية من الأكيد أنها معجبة بشدة
بسلسلة أفلام سبايدر مان وأكس من و deadpool **

= حسبي الله ونعم الوكيل فيها ** دعاء زوج أصيب ب شخ
في اليد نتيجة ضربه لزوجته في وجهها **



www.Mktbtk.uk

و
ب
ك



www.Mktbtk.uk

المهم خلصت بسرعة وغسلت أيدي وفتحت الباب ... أول ما فتحت لقيت راجل شكله مريب جداً وكان باين عليه إنه مسطول خالص مش في وعيه وعينه همرا كدا ولسانه كان ثقيل .. اللي هو كل أعراض إنه شارب حاجة منطبقة عليه... المهم أول ما طلعت لقيته عاوز يدخل .. فبقوله (أنت رايح فين!) ... عشان دا الحمام بتاع الدكاترة وبمفتاح ... دا داخل يعمل إيه!

لقيته مردش عليا وكأنه مش سامعني أو سامع ومش مستوعبني بسبب اللي شاربه ... فكررت عليه السؤال بصوت أعلى ... قولتله (أنت مين ورايح فين !!!) ... فقالي بكل عنف بلهجتة البطيئة الثقيلة المتلثمة اللي شاربة حاجة : (ملكش فيه يا زميلي... انجز نزلني فوق) أنا سمعت نزلني فوق دي وقولت لا كدا كتير لازم أبلغ الأمن ... فقولتله خليك هنا دقيقة وجايلك ... لقيته بقا أعنف وبيقولي : (لا بقولك إيه رايح فين نزلني الأول يا زميل).

طبعاً أنا فهمت إنه فاكرني أنا العامل بتاع الاسانسير لمجرد انه شافني بالاسكراب الكحلي طالع من الحمام اللي هو فاكره أسانسير .. بس أنا كنت فعلاً استفزيت منه واتضايقت من طريقته في الكلام معايا اللي فيها عدم احترام مش شغال عند أهله أنا ... إيه نزلني الأول وزميل دي! ... بس بصراحة شغلي سنتين في المستشفى دي وأحتكاكي بعدد كبير من الأشباح

اللي زيه خلاني لما حد يستفزي بالطريقة دي ماستخدمش القوة ... استخدم العقل.. أولاً عشان استخدم العقل أفضل في كل حاجة... ثانياً عشان مانضربش.

المهم قررت أخده على هواه.. قمت فاتحله باب الحمام وقولتله اتفضل ادخل ... ومرضتش اشغل النور عشان مايشوفش الكبانيه... وقولتله معلش النور قاطع جوه الاسانسير أدخل وأنا هظبطهولك من بره ينزلك.. ولما لقيته اقتنع إن الأسانسير مفيهوش نور وهيشتغل عادي دا شجعني أكمل المزاولة.

راح داخل فأنأ قولتله عايز الدور الكام؟... قعد يفكر ومش داري هو رايح فين أصلاً... فقولتله الدور الثاني كويس؟... قالي آه ... رocht قافل عليه الباب دقيقة واستنيت بره ووقت شوية جنب الباب وروحت فاتحله الباب تاني ... لقيته خارج من الحمام عادي مبسوط جداً وبيقول سلامو عليكو ولا كأنه عارفني ولا فاكرفي ورجع من الطريقة اللي هو جه منها بمنتهى البساطة.

بس ونزلت بعدها أنا للأمن بقى أبلغ عنه فطلعوا جابوه ونزلوه ... ف الصبح بقى بسألهم وأنا إحسائي كان عامل زي مدام نادية الجندي وهي بتتكلم بتناكة في آخر الفيلم بعد ما سلمت الميكروفيلم للمخابرات المصرية وبقولهم (ها عملتوا إيه مع الواد اللي قولتلكوا عليه ليل؟)... فواحد منهم قالي وهو

www.Mktbtk.uk

متحمس جداً: (جيبه طلع مليون حشيش وترامادول).. فقولتله:
المهم عملتو فيه إيه؟ (قصدي طبعاً على المسطول)... فقالي بكل
فرحة: وزعنا الترامادول علينا بالعدل.



www.Mktbtk.uk

يا عزيزى لا تطهئن أبداً للبزاييز

وأنا داخل من باب المستشفى الصبح لقيت حاجة غريبة جداً..
لقيت مجموعة من العمال جابو سلام خشب في مدخل المستشفى
وبمتهى الحماس والجدية طلغوا عليها مسكوا البزاييز المديبة لسور
المستشفى الحديد دهنوها كلها لون «فضي» وشالوا السلام ومشيو!..
آه والله.... تعبوا نفسهم وجابو سلام ودهان وشيء وشويات وهالمه
وزامبليطا عشان يدهنوا طراطيف السور الحديد الأسود باللون الفضي
وبعدين نزلوا خدوا السلام ومشيو!!

أنا مفهمتش عملوا كداليه... داشياكة يعني وكدا ولا بتوع الجودة
هما اللي اقترحوا الحوار دا إن حديد السور مينفعش كله يبقى إسود
ولازم البزاييز تبقى فضية وإلا تبقى مستشفى أي كلام.. بس كدا أو كدا
الموضوع دا حز في نفسيتي جداً وخلاقي هاین عليا أدمع.. بقى يدهنوا
الحاجات دي وسايين شطاف حمام السكن بتاعنا بايظ بقاله أكثر ممن
ستين!.... والله حرام..... طب ادهنولنا الشطاف فضي طيب؟

بس اندهاشى داراح لما عرفت بعدها بيومين عملوا كداليه...
عشان الوزير أتاريه كان جاي يزورنا تاني.. بس المرادي عشان يآشر

رسمياً على تحويل المستشفى بتاعتنا لمركز أورام متخصص.. ودا كان يوم حزين على الجميع وقتها.. أصل بقى مطلوب مننا نسيب المستشفى اللي بقالنا سنتين فيها ونروح أي مستشفى تاني بقى عشان مبقاش لينا خلاص مكان فيها.. هيبقى كلها دكاترة أورام وبس.

عشان كدا اضطريت بعد سنتين قضيتهم في المستشفى في القاهرة إنى أرجع بقى لمحافظة الأم تاني محافظة الغربية واشتغل في أي مستشفى فيها بقى.. وخلصت ورق تغيير مكان شغلي من القاهرة للغربية وروحت بعدها ودعت أصدقائي اللي كانوا في نفس الوقت بردو بيخلصوا ورق نقلهم من المستشفى لمستشفيات تانية قرروا يشدوا الرحال إليها مضطرين زيي.

كل مجموعة منهم اتجمعوا وراحو مستشفى معينة ماعدا شاكر... كان كل ما يسأل حد أنت رايح مستشفى إيه... يقوله رايح مستشفى وحشة جداً وزبالة مأنصحكش تيجي معايا... لدرجة إنه صعب عليا جدا عشان كدا لما سألني وقالي: «أنت رايح مستشفى إيه يا عاطف؟ لو حلوة أجي معاك، أصلي مختار أروح مستشفى إيه».. قولتله «رايح مستشفى في حلوان اسمها مستشفى ١٥ مايو.. حلوة جداً يا ريت تيجي معايا فيها بجد».. قالي حلو خلاص هخلص ورقي وهقدم فيها معاك مدام حلوة.. قولتله دي جميلة جدا مش حلوة بس.

طبعا دي ماكتتش المستشفى اللي أنا رايحها.. دي كانت المستشفى اللي خلص ورقه ليها حمادة سعد.. بعته شاكر... يكش يولعوا ف بعض الأتنين يا رب.



استلم وأخلي

في رحلتي الممتعة لمديرية الصحة بمحافظة الغربية وأنا جايلهم بقى الورقة الي أنا معدل فيها مكان شغلي من القاهرة للغربية بعد ما المستشفى بتاعتنا اتحولت أورام ... داخل لشئون العاملين ... لقيتهم كلهم ستات ... وقاعدين كل واحدة قدامها كوباية شاي بلبن وعمالين يسأسأو فيها بسكوت بمتتهى الملل وعدم الاستمتاع ... فقولتلهم سلامو عليكمو أنا جايب قرار تعديل نيابة وكنت عاوز اتوزع على مستشفى ... من قبل ما أقول كلمة مستشفى يدوب بقول (أتوز) ... ولسه هقول ال (أع) ... لقيت واحدة بتقولي شوف الأوضة الي جنبنا.

روحت الأوضة الي جنبهم ... قالولي الأوضة الي قبلنا ... الي أنا لسة سائل فيها! ... فرجعتلهم قولتلهم بيقلولي الأوضة دي! ... قالولي وهما مش طايقيني : (طب استنى مدام رباب زمانها جاية) .. فوقفت جنب مكتبها الفاضي مستنيها ... وفضلت مستني

... لا هى بتيجي ولا الولية الي قدامي عارفة تصطاد البسكوتة الي باشت فالشاي بلبن.. لحد ما خدت بالي من موظفة لابسة بلوزة بيضا عليها قلوب حمرا وطرحة برتقاني ع الصبح كدا... فأنا قولت باااا... الست دي شكلها متفائلة ومقبلة على الحياة الدنيا وهتفيدني... فسألتها قولتلها هو مدام رباب هتأخر؟... قامت بصالي من ورا البسكوتة الي حطاها فالشاي ومردتش... اخرجتني جداً... إلهي تشكّي ف كل القلوب الي على بلوزتك يا بعيدة.

المهم فضلت ملطوع فترة لحد ما جت مدام رباب... خدت مني الورق بطراطيف صوابعها كأنه ورق تواليت مثلاً وقالتلي أنت كنت واخذ تكليفك فالغريبة؟... قولتلها آه... قالتلي تمام... هتروح بقى الإدارة الصحية الي كنت تابع ليها فالتكليف تستلم وتخلي... وبعدين تروح الوحدة الصحية الي أنت كنت فيها في التكليف تستلم وتخلي وأنت واقف ف نفس الوقت... وبعدين تجيلي.

قولتلها وحدة صحية إيه!... أنا سايبها بقالي ستتين وأخليت منها من أول ما استلمت النيابة... هروح لها أعمل إيه!... وإيه استلم وأخلي ف نفس الوقت دي!... هبقى استفدت إيه يعني أو إنتوا هتستفادو إيه!... يعني مكان أنا مش فيه أروح استلم وأخلي منه ليه!... إيه الفكرة!!!... قالولي هو كدا النظام... وبصراحة حاولت ألاقى مبرر للحركة دي ملقتش غير إنهم بيحاولو يجربوني

يشوفوني شغال ولا لأ... الي هو يا ترى الدكتور دا بيستلم ويخلي
بسرعة ولا بيعلق نلحق نرجعه لمديرية القاهرة.

المهم عملت الي هما عاوزينه وروحت الإدارة والوحدة الصحية
الي كنت فيها من سنتين استلمت وأخليت في نفس ذات اللحظة
وسط اندهاش الناس هناك.. الي هو إيه الهبل الي أنت فيه دا يا
دكتور!.. بتستلم ليه مدام هتخلي ف نفس الوقت!

بس ما علينا... ورجعت بقى تاني بعد دوامة سحلة طويلة
وفرهدة وإمضات استلام وإخلا ومشاور كتيرة للمديرية...
فدخلوني بقى للدكتورة المسئولة عن توزيع الدكاترة بالمستشفيات..
قالتلي عايز تروح فين؟

فقولتلها عندكو مستشفيات إيه حلوة هنا؟

قالتلي فيه «بسيون العام»... قولتلها طبعاً طبعاً بلد نجمنا
الكبير محمد صلاح.. بس لأ بعيدة.

قالتلي فيه «السنطة العام».. قولتلها طبعاً طبعاً بلد نجمنا الكبير
على جبر... بس لأ... مبحوش.

قالتلي فيه «زفتى العام»... قولتلها طبعاً طبعاً.. وحاولت
أفكر في حد أعرفه يلعب منها ماعرفتش... فاضطريت أوافق.

فقالتي تمام... هتروح زفتى العام بس هنعملك انتداب ٣ شهور

مش مستشفى زفتى دي بردو يا خويا

روح بقتى إدارة زفتى عشان استلم وأخلي منها زي ما قالولي فالمديرية.. سألت على شئون العاملين قالولي في الدور السادس.. دورت على الأسانسير لقيته مش شغال! ... فاضطريت بقتى أطلع على السلام.. وماشاء الله.. السلام كانت بتتغير مكانها مع تغير الأدوار.. اللي هو أنت طلعت التالت.. طيب دور بقتى ع السلم الي بيطلع الرابع فين يا شبح.. وهكذا..

دا غير إن الأدوار كلها شبه بعضها ومش مرقمين الأدوار وحاجة فلة.. لدرجة إني اندمجت في الطلوع لحد ما وصلت التامن.. قالولي أنزل دورين.. جيت أنزل الدورين اندمجت وأنا نازل وصلت الرابع.. بصو هو كان يوم منيل الحمد لله.

عموماً خلصت الاستلام في الإدارة والموظفة قالتلي روح بالورقة دي بقتى على مستشفى زفتى العام استلم وأخلي بسرعة وتعالى عشان نخليك ونعملك الانتداب الـ ٣ شهور للسنتة.

روحت مستشفى زفتى ... وصلت عندها لقيت كمية تكاتك مهولة قافلة مدخل المستشفى مفيش مكان أدخل منه.. اتصرفت.. دخلت جوه توكتوك منهم من بابه اليمين.. طلعت من بابه الشمال... لقيت توكتوك تاني ... دخلت من بابه اليمين طلعت مالشمال.... لقيت توكتوك تالت دخلت من بابه اليمين طلعت من بابه الشمال لقيتني جوه شئون العاملين.. أتاري التكاتك واصلة لحد جوة.

المهم لقيت أوضة واسعة مليانة موظفين.. كلهم كانوا مبسوطين إلا واحد بس.. كان مكشر وبياكل في حته حلاوة مولد صغيرة قد كف رجله كدا.. فسبتهم كلهم وقمت رايحله.. أصلي بحب حلاوة المولد أوي... أقوله لو سمحت يا أستاذ أروح بالورقة دي لمين؟ ... يبصلي من فوق لتحت وهو مكشر ويكمل كتابة في الورق الي قدامه ومايردش.

فقولتله تاني.. طب الورقة دي بتخلص هنا ولا من حته تانية؟... مايردش بردو! ... طب أنت زعلان مني ف حاجة؟ ... حد ضايقك طيب؟ ... حد داسلك على طرف؟ ... طب على إخلاء طرف؟ ... طب مالك!! ... السمسمة طعمها وحش طيب؟ ... طب أجبلك تشرب؟ ... طب إيه!! ... طب سلامو عليكوا!

وروح لموظفة تانية بشوشة شوية قولتلها سلامو عليكوا لو سمحتي أنا جاي استلم أخلوي.. قالتلي إيه! ... قولتلها أنا جاي

استلم أخلولي.. قالتلي هنخليك ليه!!!.. فأديتلها الورقة قولتلها
المديرية عملتلي انتداب ٣ شهور لمستشفى السنطة فهستلم وأخلي
من عندكم وأروحلها ... وبعد الـ ٣ شهور هرجعلكو تاني لو
لسه فاتحين.. قالتلي:(آه طيب روح بس قسم العظام يمضولك ع
الاستلام والإخلا وأنا اعملهاك)

روحت قسم العظام.. سلامو عليكمو إزيكو يا دكاترة أنا
المديرية جابتنني زفتي بس عملولي انتداب ٣ شهور للسنطة..
فكنت عايز إمضا من القسم عشان أخلي.. قالولي لا السنطة
إيه وانتداب إيه.. إحنا محتاجين نواب.. أنت نبطشي معانا بكرة
الأحد.. قولتلهم «طب بالنسبة للانتداب بتاع السنطة الـ ٣ شهور
اللي المديرية عملتهولي دا أطنشه عادي؟».. قالولي «والأثنين عندك
عيادة والتلات عمليات».

بس واستلمت الحمد لله في زفتي ومأخلتش.. وسط تساؤلين
كبيرين يدوران في ذهني حتى الآن.. الأول: إزاي الحوادث اللي
بتجيبى المستشفى بتدخل من التكاتك اللي واقفة دي.. والثاني: إزاي
حد بيكشر وهو بياكل حلاوة المولد في نفس الوقت عادي كدا!

مكتبتك



Mktbtk.uk

www.Mktbtk.uk

و
ب
ك



www.Mktbtk.uk

نهاية وبداية

وزفتى كانت بداية لمغامرة ورحلة جديدة ليا في وزارة الصحة، السؤال بقى هل هكمل وأعمل كتاب جديد فيها ولا هعمل كارير شيفت وابدأ المشروع اللي طول عمري بحلم بيه، مشروع مزرعة بسلة متهمنة، الفكرة دي محدش عملها في مصر قبل كدا ولا في أي حته، البسلاية الواحدة هخليها تبقى قد اليوستفنداية كدا، مشروع ربحه مضمون وأبقى ريحت نفسي من الطب ووجع دماغه وفي نفس الوقت ريحت ست البيت، بدل ما تقعد تفرط ف البسلة طول اليوم، هي بسلاية واحدة بالعدد تحطها ف الحلة وتقطع عليها جزر وشكر اااا... وبألف هنا يا ست الكل ♥

أحمد عاطف

مكتبتك



Mktbtk.uk

www.Mktbtk.uk

و
ب
ك



www.Mktbtk.uk

www.Mktbtk.uk



www.Mktbtk.uk

مكتبك

مكتبك لعمل الكتب اندرويد ورفعها على جوجل بلاي

كتب معرض الكتاب على موبايلك اثناء المعرض

يمكنك طلب اي كتاب على جوجل كتب فقط بربع الثمن

ان اردت رفع كتاب لك يمكن ان ترسل لنا على صفحتنا
على فيس بوك (مكتبك) او (Mktbtk.uk)

يوجد ايضاً افلام ومسلسلات بدون اعلانات على موقعنا

www.Mktbtk.uk